

鎮撫福建

提督南贛河漳

巡撫陝西

巡撫寧夏

巡撫甘肅

又又遼東

又又雲南

又又貴州

琬琰廣錄

鎮撫福建

夏原吉 湖廣湘陰人

楊勉 應天江寧人

焦宏 河南葉縣人

張楷 浙江慈谿人

金濂 直隸山陽人

薛希璉 浙江麗水人

孫原貞 蘇州人

劉廣衡 江西萬安人

滕昭 河南汝州人

張瑄 應天江浦人

高明 江西貴溪人 誌銘 自撰 碑銘 何喬新傳李東陽

王繼 河南祥符人

陳天祥 直隸吳縣人

趙鑑 山東壽光人

王堯封 直隸定興人

胡璉 直隸汝陽人

朱紘 直隸長洲人

王忬 直隸太倉人

胡宗憲 直隸績溪人

阮鶚 直隸桐城人 誌銘 李春芳

王詢 四川成都人

吳桂芳 江西新建人

劉燾 直隸天津人

游震德 直隸婺源人

譚綸 江西宜黃人

汪道昆 直隸歙縣人

塗澤民 四川漢州人

何寬 浙江臨海人

殷從儉 廣西臨桂人

金朝人

金朝人

金朝人

金朝人

金朝人

金朝人

金朝人

金朝人

金朝人

五耳翁安宅誌銘

高明自撰

大明永樂丙申洪水破縣治高氏屋臨溪基壞成洲
譜牒隨湮偶於大姑家得先世遺文并元朝分產契
券載諱仁字寬仁仕唐福建觀察使諱觀字可仰仕
宋國子學錄創桐源書院生惠甫惠甫生彌高字希
顏仕元遂州都目陞太原路總管府判高祖諱德芳
曾祖諱原本祖諱則銘父諱吉昌字洪祐初封文林
郎山東道監察御史再封中憲大夫南京都察院右
僉都御史母鄒氏初封孺人再封恭人生明於永樂
壬寅十二月二十五日丑時左手大指旁出二小指

為見性慙訥言年十三母疾劇籲天剗股以愈疾十
五歲充邑庠生從天台董廉泰和胡汝占二先生授
詩經命之字曰上達景泰庚午領鄉薦明年登柯潛
榜進士壬申都察院會考諸進士明居首授山東道
監察御史癸酉巡九門鈔法劾同事崔主事徐州人
李苟等吾官吏侵漁越訴犯新例該充軍明以越訴
虛者宜如例若李苟得實法宜杖上可其奏且行
天下以為例曰成則內庫兼督五城兵馬建言民情
兼諫造龍舟忤旨戶部金尚書入戚指揮死罪明
辯而釋之徐州以妖言趙釗等十殺作謀反要功訊

無反狀辯以本罪得免延及妻孥乙亥二考進階文
林郎封父母以前官丙子巡按河南有司以黃河退
灘地升科納糧明慮漕遷不常恐貽民患禁免升科
考退貪污老疾官六十四員清積年滯案辯久淹冤
囚康皮等俱免死以除弊興利事開四十餘條榜示
郡邑秋開科慎擇賢能供事考官序云盡洗歷科之
弊盡收有名之士此非明之能皆執事者盡力所致
西北有警奉勅督運糧草軍餉不乏丁丑巡京畿
安撫幼軍舊例都察院選御史中二人總理三法司
獄案里各道奏章彈文議諸司大政都御史寇深遍

詢各道咸以明及王越對於是明濫竽前事戊寅春
劾兵部尚書陳汝言弄權壞法下獄死薦吳琛代管
三法司事請告歸者十月回院鎮守江西太監乘達
奏臨川王愬言妃悍下都察院議王越吳琛欲差皇
親及中官往勘明謂宜請 勅初責臨川聽其具實
自奏寇深從明議事得不擾臨川家室亦諧二日午
刻囚五十餘反獄事出倉卒明即以帖傳報九門毋
故人出仍詔召於途得軍百餘人緝至木廠盡擒之
寇深嘉明之功欲以狀聞翼明 承天門災事遂寢
庚辰正月明作彈文劾天下大朝官列名雖以御史

趙銘居首實未助言 上怒其辭觸忌諱傳旨詰筆
者時御史相繼得罪人情震駭明憫趙非辜獨任其
咎寇深見明毅然不惧因曰四五年來凡奏疏彈文
皆高明主筆政事亦多由其區處 上聞之顧左右
曰是得用的御史宜釋勿問二月甲子召至 文華
殿同錦衣指揮門達承旨藉忠國公石亨家明憫藏
獲四十餘人非辜附中官奏之得不隨坐賚以羊酒
三月監殿試進士吏部因山東缺按察使以王越與
明並列以聞 上語學士李賢曰高明宜留內用迨
秋陞大理寺左寺丞寇深憮然不懌同列請其故徐

曰日者因事召入文華殿無上許深曰行將陞高明
為都御史今何入寺耶是年同侍郎郝璜脩撰劉俊
清武職功次貼黃刑部員外郎同邑李直以耿介忤
權要污以贓罪營救之事果得白友人御史鍾同言
事下獄死不得屍謀而得之又遍告同年買棺斂之
付其幼子啓歸葬甲申今上嗣位陞南京都察院
右僉都御史南京守備中官每朔望會文武重臣議
事明初至有趙都指揮詬遂安伯楊千戶又舉刑部
蕭郎中之過然有主者衆相顧寂不發一語明甚惡
之刑部侍郎廖莊曰此常態也明益不因平厲聲曰

此處五府六部會議大政紀綱法度所在豈汝罵人
場耶論法難容理亦難恕但吾初至姑且包容二人
悚惧而退主者亦有慚色此後再會上下肅然自遷
都之北番內外重臣守備百司其存若憲綱少不振
衆議鼎沸時因循年久政與公廨俱頽故聚皂隸錢
付御史張珩一新院宇選廉能御史各任迺事期於
無負委任每會議大政辯決重囚雖有一得之愚難
以縷述因霑助為災極言內自宮禁朝廷外及天下
四夷皆有陰盛陽微之象宜脩德以回天意上嘉
納行令兩京大臣同加脩省詔明同吏部侍郎章

綸考退京官三十餘員又同成國公朱儀清理四十
八衛軍政以革宿弊東海自揚州至兩廣長江千里
鹽徒為盜借名號守臣調軍往征失利賊勢愈熾委
明剿捕綸音誤獎明廉慎有為既而又差太監王
允中少監劉佃錦衣指揮馮瑤校尉五十名全家抄
提首惡愚慮抄則累及妻孥濫延無筭且驚疑人心
地方愈擾於是館穀校尉不令出戶闕選差能御史
顧以山戴琥用賊江載官軍往來長江仍用賊捉賊
剿無遺類又於活江高山立堡哨瞭以立久長之規
而江湖始寧同事者欲論功明以職分當為遂寢不

行未幾賊六十四名反獄仍遁入江上為患采衆人

長策不半月悉擒之無一得脫者花內官用官舡八十號

販鹽又擅挈儀真張指揮因而軍與舡夫千餘人鬪

勇幾乎生變明即撫其衆盤鹽入官數其罪劾之置

以法而事始妥續奉勅諭清兩淮鹽法劾戶部及

遼東等處巡撫官阿諛權豪中鹽為壞法之首尚書

馬昂等深銜之凡所陳鹽法事宜悉被沮幸蒙聖

明洞照其情悉允所陳鹽法始清壘上章乞致仕不

報最後陳情乞得終養先時造巨艦入江督軍剿賊

扁具艦曰籌亭乘此歸寧至餘干之長灘水涸艦不

能進夜夢神人開河至曉無雨添漲三尺活舟抵家
養一載母卧病兩月明與妾吳氏更迭夜起四五次
進湯藥卒後三載父病痔又病疽遷連三月躬滌汚
進藥百方護持不敢纖失及卒而明亦形枯卧病幾
至於斃喪事悉遵文公家禮守制三年纔滿閩之上
抗盜起弄兵 勅書就家起明趨命啓行調兵搗其
巢穴宣化撫其餘衆渠魁黎仲端連年為閩廣江西
三省之害率衆竄海濱差副使劉城等設策擒之餘
黨亦散祈上抗溪南十里置溪名曰未定發鹽運司
餘鹽易不科創諸司設官置更百度畢舉地方亦寧

始官軍入山生擒四百餘賊鞠具稔惡四十餘人梟
首示衆其餘三百餘人作協從可矜奏發充軍又濱
海民尼璠等捏造黃榜招人謀不軌明慮興大獄則
罪及無辜貪功則爵濫於是止坐妖言律而免蔓延
之禍民始安而事亦妥入閩將一載冒瘴成瘡故懇
一疏辭功一疏乞骸骨不待報納還 勅書符驗先
自扶病還鄉家 天恩曠蕩許致仕退居縣北水門
莊創早閑亭復於縣東仰高山創三宜菴鑿白鷗湖
又會鄉之致仕官乘潤等十三人效香山故事結薌溪
社游樂山水以保晚節六科十三道及監生人等連

歲疊章奏乞起用而不知明年老身憊不堪用矣今年六十有二以陰陽訓術李詳卜地於縣北五峯之南山面乾焉壽藏更名曰安宅以俟之先於五十歲陳情以無才為一宜退有疾為二宜退親老為三宜退故以三宜自號五十七歲閩中有事宜再起事畢有疾宜再退加此二宜故又號五宜妻徐氏夏塘徐景春女先封孺人再封恭人生男鵞早逝次男鵬充邑庠生娶龍山汪氏女三貴玉潤玉端玉適真人府張留墳常山進士鄭惟桓庠生周珮側室吳氏金吾衛千戶吳全女生女貞玉適江藩瑞昌恭僖王次

孫竹石主人封輔國夫人又側室吳氏吳全姪女生

男高鴻

平生所作愚軒稿糊壁稿南

臺稿籌亭稿多散失惟終養錄征閩錄刊行今磨石

二塊以一鐫此以一閩鐫遺忘并將來者竊意無德可銘聊書數語以自愧

莫道大乎孝欲盡之而未能亦莫大乎忠欲盡之而未能大者既如此雖有小善何足稱

都察院左僉都御史高公神道碑

何喬新

成化二十一年秋九月十有九日都察院左僉都御

史高公以疾卒于家有司以聞 憲宗皇帝遣江西

布政司叅議林同以牲幣諭祭焉公卒之三年為弘

治元年太子太保兼兵部尚書余公請于 朝謂公

居官以廉慎稱且有平閩寇功宜 命有司為治葬

事 今天子允其請特命有司治其塋域于縣之某

山之原公之子鵬卜以是歲某月某日塋既詣 闕

頓首謝乃捧監察御史鄭君惟桓所述公行狀詣予

拜且泣求銘公隧道之碑蓋以予與公同薦于鄉同

官于朝而鵬又嘗從學予弟喬壽知公最深故也予
辭不獲廼叙而銘之公諱明字上達世家信之貴溪
其先有諱仁者仕唐為福建觀察使寔公遠祖諱觀
仕宋為國子學錄以道學鳴作桐源書院以淑其徒
曾祖諱元杰祖諱則銘再世不仕皆以端厚稱父諱
吉昌以公貴累封中憲大夫都察院右僉都御史母
鄒氏累封恭人公自幼以孝聞年十三恭人病甚公
焚香籲天請以身代又剗股肉投粥中恭人食之頓
愈稍長補邑庠生篤學不勑為文以理為本不為浮
豔之詞景泰庚午領江西鄉薦明年登進士第試政

都察院未幾擢山東道監察御史彭城李苟等苦官
吏貪暴訟于朝事下御史臺時越訴者例謫戍邊
公奏曰謫戍之例為妄訴者設苟等訴不誣法當杖
一康定皇帝從之因著為令村氓趙劍等為詆言吏
欲功執其黨數十人誣以謀反獄上公曰此愚民
處以詆言足矣又致其反何刺也繇是其家屬皆獲
免巡按河南黜汙暴誅允頑風聲凜然郡縣寬獄吏
不能讞者悉為辨之黃河南徙民耕其填淤者畝收
數斛吏議使民計畝輸稅公不可曰河徙不常異日
平陸復為巨浸耕者何以供稅議者乃止及還朝

適邊報皆至公奉勅督邊餉人皆趨令靡後期者都御史寇深剛愎自用屬官少當其意者尤忌江右人獨於公敬愛無斁凡大獄大政惟公言是聽章䟽當上者俾公具草焉英宗皇帝既復位天下藩臬郡縣百司來朝監察御史趙銘等劾其罪而彈文出於公上怒其觸諱命中官詰草奏者衆懼莫敢對公毅然曰彈文實出明手銘等無與中官入白之上顧左右曰賢御史也釋不問忠國公石亨以擅權得罪言者劾其不軌上命公與錦衣衛指揮門達籍其家公語達曰亨非有反謀其僮僕不當從坐達

然之遂同以實聞得免者四十餘人尋陞大理寺丞凡獄情矜疑者參錯訊鞫多所平反憲宗皇帝嗣位遷南京都察院僉都御史時南臺以去輦轍遠憲度稍隳而百司亦多自恣公振風紀明法令痛斥庶官之貪暴者南都肅然會淫雨彌月公上章言此皆陽徵陰盛之徵宜脩德以回天意上嘉納之褒民販私鹽者縱橫江上商旅幾絕勅公勦之公遣南臺御史顧以山戴琥往捕授以方畧擒賊首九百餘人長江以清行舟無阻公念二親老連章乞致仕未允又三䟽乞終養上乃許之居無何二親相繼逝

執喪哀毀幾不能生戊戌上杭盜起兇燄日熾詔起公于家改左僉都御史賜勅許以便宜從事公力疾而行至則先揭榜諭之賊恃險不服乃遣兵搗其巢穴馘其渠魁撫其脅從又以上杭之溪南里寔盜淵藪乃析為永定縣以統釐之於是汀漳之間晏然公以寇平又上章乞歸上憫公久勞瘴鄉乃許謝事既歸絕口不談官府事惟與子弟及縣之俊秀講論經史而已給事中虞瑤大學生袁慶祥等皆上章乞起公用之然當道多與公不合者故卒不用公生於永樂壬寅十一月二十五日至其卒得年六十

有四娶徐氏初封孺人再封恭人側室吳氏子男三長鸞蚤夭次即鵬邑庠生季曰鴻女四適張留壘周珮宗室輔國將軍宸渠其一則適御史惟桓即狀公行者惟桓蚤從公學故公以女妻焉所著詩文散軼惟終養錄征閩錄安宅錄傳于家初公奏乞歸養曰無才一宜退有疾二宜退親老三宜退故自號三宜及自閩歸語人曰國家有事宜再起事一宜再退更號五宜臨歿索筆大書曰平生無一事欺天至死全百骸歸地命鵬揭于柩前嗚呼公之為人兩言盡之矣銘曰

於赫高氏維信聞家爰初學錄樹德振華顯允中
丞克紹厥祉允哲允文秉時奮起乃擢御史玉斧
鉄冠風節矯矯嚴而不殘乃丞大理平反庶戮漢
有張于公繼其躅乃陟南臺憲度是宣雍荒獮獠
畿甸肅然函封亟上曰有老親俾歸終養繫帝
之仁聞有狂獠狺狺吠噬帝命起公俾往督制
咸以戡馘信以招攜曾不踰時群醜以夷功成不
居返我初服勇退之節士論攸屬謂公未老尚其
起之胡茲長逝奄莫予追嗟嗟中丞位不滿德考
其行治維時之則高墳巋然信溪之濱勒詞寧碑

式昭後昆

五宜高公傳

李東陽

公高姓諱明字上達號愚軒後更號五宜廣信貴溪人也未冠時嘗刲股愈母疾以孝聞景泰辛未舉進士拜監察御史諫造龍舟巡都城九門稅鈔劾崔主事敗法監內庫并督五城兵馬事有感指揮者為大臣所怨坐死辯釋之徐州民越訴賦吏例當戍公議戍例為誣訴設今所奏實不過當杖制可著為令州又以妖言十餘人具反獄以聞公訊無反狀止坐本律按河南宣滯理枉禁賦河徙退地點吏不舉職者六十餘人監丙子鄉試得人為多會西北有警

餉不告之內巡畿郡入總三法司奏牘天順改元率
諸御史劾兵部尚書陳汝言怙勢亂法下獄死聲血
振忽午刻臺囚五十餘人劫獄走衆相顧駭愕公馳
片紙報九門毋出行者使號諸途得卒百餘襲捕之
庚辰劾天下述職官御史趙明為疏首實出公筆辭
頗激上詰主筆者公請獨任不以累趙都御史寇
公深素重公從容言累年彈文奏章皆高明手出幸
不以細故為罪上曰是能御史也置不問吏部擬
公為山東按察使上謂李文達公賢曰高明宜內任
又謂寇深曰明可都御史未幾遷大理寺丞稽武官

貼黃御史鍾同景泰間諫復儲事下獄死屍久不

獲公究得之率諸同年買棺治歛屬鍾子啓歸葬焉

憲宗卽阼擢南京都察院右僉都御史政令清肅

時淫雨為災極言內自宮禁外至夷狄皆有陰盛

陽微象又請塞網馬納粟諸悖違薦卽中何宜等可

用朝論躡之揚州鹽寇作守兵失利勅公督捕公

造巨艦名曰籌亭往來江南北躬督卒伍會遣中官

及錦衣衛校卒五十人籍首惡家公慮變起館穀之

不使出戶闔分遣御史督兵禽滅九百餘人盡得之

中六十餘劫獄復入江為盜公伺賊出沒伏蘆洲乃

以官兵感賊人蘆中伏起禽之亦不遺一人又並江
高山置邏堡為久計有中官粥私鹽又擅執儀真指
揮卒閱不可解公撫卒令勿譁籍鹽入官乃刻舉如
法覈南京諸曹不職者三十人清四十八衛軍政理
兩淮鹽課劾戶部及諸巡撫官縱法吹陳利害十餘
事多見施行公念二親老弟又夭死再乞致仕不許
乞終養許之既免喪闋上杭盜起勅起公往捕公
力疾上道督兵勦賊錄賊俘四百餘人誅首惡四十
餘悉輕坐海濱民矯令募亡命為不軌公慮興大獄
止坐妖言律誅之既又析上杭溪南里置永定縣衆

多其功公盡以推將士會疾作不入報疏乞骸骨納

勅符以去

上察其懇誠特許致仕歸居縣北創

早閒亭鑿白鷗湖結薌溪社諫官因子生文章起公

竟不起自述銘并輓章為卷成化乙巳九月十九日

忽不樂書對句曰平生無一事欺天至死全百骸歸

地遂卒年六十有四上遣官諭祭後三年今天

子命有司治壙蓋異數也所著有愚軒稿糊壁集及

南臺籌亭稿多散失惟終養征闈二錄藏于家娶恭

人徐氏子二鸞早世鵬縣學生則室子鴻孫二楠梓

鵬游京師請傳公行以傳公婿鄭御史惟桓有狀

太史氏曰高公初乞歸疏稱無才一宜退有疾二宜退親老無昆弟三宜退及以治盜徵謂宜再起功成疾作直再退其號五宜以此昔孔戣有二宜去司空圖有三宜休皆歛退事史傳所稱載嗚呼勇退固難事然退而出出而復退其出不徇物而退不為矯情者蓋尤難焉君子論士必先大節矧其才卓卓有治效可指述哉故公雖名位未極功澤不徧施揆厥終始稱國之大臣可也

都察院右副都御史山峰阮公墓誌銘

李春芳

中丞阮公皖之桐城人也諱某字某號山峰居士系出步兵晉黃門侍郎遙集自陳番受節鎮皖樂山山之勝因家焉歷唐諱擬江者以大將軍顯宋諱師簡者以進士顯文武後先輝映由進士五傳而生暹暹生廷瓚人稱愛雲翁則公父也愛雲翁少孤嚴事其兄讓千金產有隱德沒祀于鄉後以公貴贈南京刑部主事配吳氏繼童氏俱贈安人正德己巳歲大祲翁傾貲振之所全活甚衆無不願翁生賢子者已而

母吳以是歲十月二十四日生公公生之夕室有瑞
光始為兒時端重不戲六歲就外傳輒問曰讀聖賢
書不當學聖賢乎傳大異之嘗作燈花賦以見志長
而博綜經史百家文聲籍甚嘉靖甲午以儒士中應
天鄉試乙未遊南雍少司成歐陽文莊公方與諸士
講明致良知之學公聽受而篤信之曰學不在是乎
自是盡棄平日馳騁之見而反之身心矣甲辰第進
士觀吏部政會星變上疏乞崇廉介以抑奔競不報
太宰熊公某獨亟稱之乙巳授南京刑部主事敬簡
明允精于讞比千戶劉息以善訟作姦公暴其罪竟

置之法時有殺人而擯於市者都下譁然莫知其由
邏者偵捕朱監生甥抵之業已誣服公心疑為冤齋
沐禱神竟得真殺人者於是才聲大振三載奏最改
河南道監察御史巡視光祿光祿多中貴人懾公風
裁省浮費且十萬計地震應 詔言七事多見採納
已酉巡視倉場無理河道蘇運卒立議單劾罷漕帥
之不職者漕政以肅明年案順天諸墨吏望風解印
綬去任丘進士王聯豪橫數殺人擬大辟乃撫拾胡
公縉宗詩誣奏謗訕 上怒逮下詔獄并逮撫按藩
臬郡守三十六人公曰以言語罪人非盛世事矧誣

構之乎漸不可長乃極力調護其間事竟得白尋改
畿內督學公以首善自京師始正身帥士士蒸蒸然
鄉風諸所請謁悉謝卻不避權右庚戌虜入犯至薄
都城下公道校士涿州涿固都城要地也公選率生
徒張皇號召士氣倍振虜退條上禦虜十事動中機
宜當是時公職在俎豆不與兵戎乃毅然以憂時捍
患為已任其康濟之弘猷已於此露其端云癸丑擢
浙江提學副使頒示條約一如畿內而因地裁成之
得人為盛浙方歲苦倭寇甲寅尤甚公下令諸生操
弓矢習射作忠義之氣乙卯夏省城戒嚴撫臣檄諸

司畫地防守公當守武林門則列營闕外令士女分
道入遞至遞開視他守者獨無追迫蹂躪之慘民咸
德公焚香祝天曰安得阮公開府以活百姓耶丙辰
陞廣西右叅政臺省交章薦公有文武才可大用
上擢公右僉都御史提督軍務巡撫浙江聞命即展
布方略誓告將吏四月賊攻乍浦追斬皂林賊奔桐
鄉公冒重圍入桐鄉方賊之圍城浹旬也多方攻擊
而公亦隨機應之顧孤城力乏數請援於總督胡胡
不應城中危甚即睢陽之急不是過也賊又持總督
紅牌抵城下議和人心搖惑非公抗議固守鮮不敗

者少宰松溪程公序平夷碑亦謂公有睢陽之節武
穆之忠云久之賊計窮遁去五月賊陷仙居公又募
金台諸郡兵分疑設伏凡三戰大破之而賊首徐海
黨與衆盛復集舊巢時趙尚書文華出視師與總督
胡共持和議乃公獨銳然決戰會言官上疏罪議和
者詔下專命公勦平公得報益自罄竭命奇兵四伏
正兵突擊賊遂大敗四竄巨魁陳東麻葉辛五郎皆
就擒賊又奔據沈庄憑險自固若謂必不可破而主
和議者猶觀望不進公大怒曰不滅海尚留根蔓乎
檄諸道分兵四圍夜渡濠薄賊柵火其巢自寅至酉

力戰俘獲甚衆徐海始就滅功最稱奇而讒忌亦自
是漸起矣公顧一意向賊謂諸將曰寧波鴈門久為
賊據而舟山餘黨尚在柰何安枕耶遂夜驅水陸兵
並進大破於蔡奇山獨山大潭山水戰於清港洋丘
家洋直抵舟山賊方除夕酣醉遂擒斬殆盡自是兩
浙三吳始得休息矣上賜金綺者五進秩者一方
鄉用公而忌者愈忿謀奪公柄移公專鎮閩是時閩
寇方張而兵弱財匱私計可以困公而公不為困丁
巳春公發浙江倭犯福寧公抵建寧倭犯會城已而
犯福清犯海口羽書猝至公日夜治兵儲糗慎邏謹

謀而於先登陷陳之士不惜重賞往往能得其死力
遂奮擊賊衆於古源陽崎長樂港閩安鎮凡十餘戰
計任事不過數月捷書飛奏上大加獎異柰何忘
之者力謀傾公乃指摘公糜費儲餉肆為婁菲風聞
論列遂被逮至京然募兵壯造船戰捐賞予卷牘具
在有司可覆視也卒莫能中傷落職歸角中私第絕
跡城府東阡西陌朋舊過從愔然不知老之將至也
會有論胡督府宗憲侵浙餉者復波及公公疏請兩
省互覈而人多依違其間迨隆慶丁卯公病轉劇伯
子某伏闕陳情於是大司徒馬公森大司馬霍公

冀合疏題覆行兩省巡按覆報公之心事行且昭雪
乃以十二月七日歿於正寢享年僅五十有九耳嗚
呼天亦忘之人何尤哉余嘗讀陳平傳而重為公慨
也平事漢謀所以撓楚者請捐金行及間高祖與之
黃金四萬斤恣所為不問出入卒間楚君臣滅羽垓
下由公觀之使平也生今之世身且不免又安能吐
六奇而封萬戶哉今按中丞五臺徐公紳狀叙浙閩
事獨詳有以也浙之士民思公之德相與立祠俎豆
公夫豈可強致哉噫此益足以觀公矣若夫勘副使
李某同知唐某以金善類哭送南野先生旅櫬以敦

師道不拜仇咸寧不附陸都督不謁趙督察以勵士
節皆狀中所稱述者自當信後云公娶于張克相公
生伯子自崙五月而卒贈安人繼程氏生仲子自愷
封安人生子男二自愷自華孫以昂以巽自崙生以
漸以節自愷生孫女三公所著有藁藁錄臺中語諸
書行于世其天德王道諸書則歲之家某等卜以某
年月日葬公于某原余素辱道誼知公獨諗因誌而
銘之銘曰文以造士姐豆雍容武以殄寇軍旅折衝
讒忌多有疇掩厥功東閩西越祠祀攸崇

琬琰廣錄

提督南贛汀漳

金澤 應天江寧人

韓邦問 浙江會稽人

周南 浙江縉雲人

蔣昇 廣西全州人

陳恪 浙江歸安人

王守仁 浙江餘姚人

聶賢 四川長壽人

潘希曾 浙江金華人

汪 鉉 直隸婺源人

周 用 直隸吳江人

陶 諧 浙江會稽人

錢 宏 浙江錢塘人 碑銘 重承叙

唐 胄 廣東瓊州人

陳 察 直隸常熟人 傳 王世貞

王 凌 浙江建德人

吳 山 直隸吳江人

李 顯 浙江樂清人

虞 守 愚 浙江義烏人

顧 遂 浙江餘姚人

朱 紘 直隸長洲人

龔 輝 浙江餘姚人

喻 智 直隸晉州人

盧 勳 浙江縉雲人

張 烜 廣西慶遠人

談 愷 直隸無錫人

汪 尚 寧 直隸歙縣人

王 鈞 浙江奉化人

周 滿 四川漢州人

何思直隸確縣人

宋淳浙江開化人

范欽浙江鄞縣人

楊伊志直隸吳縣人

陸穩浙江歸安人

吳百朋浙江義烏人

張紳廣西馬平人

殷從儉廣西臨桂人

李崇湖廣長沙人

都察院右副都御史錢公神道碑銘

童承叙

公之卒上既賜祭葬其弟太醫院使君迺請故少

傅李文康公為之銘復礮石墓道以其文屬官采氏

官采氏在公伯仲間交最久知公德烈為稔迺不辭

而序之序曰公錢氏諱宏字可容別號江樓世家錢

塘少穎重不群從父京師學易大學士靳公之門為

所器異弘治甲子以醫籍舉順天高第錄其文以式

正德戊辰登進士試銓部政己巳遭父喪辛未服闋

除刑部湖廣司主事乙亥遷廣東司員外郎執法明

允尚書張公重其才使閱章奏叅決庶獄會慮囚多

所平反有權貴恃勢撓法公竟按如律因見忌丁丑
轉山東按察司僉事辛巳遷副使公在山東幾十年
歷綜兵備清戎驛傳屯田諸務勞績最著初未毅皇
帝南狩供需靡紀極巡撫王公遴公使處分隨事經
緯貴近弗能屈上下賴為吏有以行賄敗者公按治
之吏窘陰欲持公伺之卒不能搆章立潦歲大侵公
賑卹盡力全活幾萬命民為立祠祀之巨寇起齊魯
間公督兵殲其渠魁餘悉解散時巨璫鎮守役民夫
無時公首裁之民間公名輒曰錢使君青天也至今
誦焉嘉靖丁亥進廣西按察使持憲有體馭徭撞以
恩信戊子入覲諸酋長率衆送迓道左蓋曠事也已
丑轉福建右布政使辛卯進湖廣左布政使二轄事
劇蠹弊叢集公至爬剔殆盡姦猾斂避壬辰擢都察
院右副都御史奉 璽書提督南贛軍務公益感奮
設方畧勤撫御遠近效順盜賊屏息公以其地上游
不可一日弛備乃刻武藝圖訓將士身自臨閱軍聲
大振復為文諭民勤儉併給示賊所嘗巢處俾知所
嚮祠宋清獻趙公信國文公以勵忠節癸巳疾作遂
懇疏乞歸至再上始得請其年以改元禫恩進階通
議大夫公歸錢塘故廬閉門養病踪跡不一及官府

暇則焚香讀書而已凡三越歲竟卒卒年六十有一
公爽剴博碩體貌凝峻臨事存大體而端方果毅不
可奪志余數與論天下事慷慨激烈具有端委蓋經
畧之才台輔之器而不虞其勇退急逝也性敦孝友
兄寓家居御醫君宙暨院使君寰皆官于朝公每入
京輒連床對飯旬月弗能去既別問遺不絕庶弟寶
早孤公延師教之復為嫁娶遣歸克弟子員厚遇族
鄙歲所入租分給貧匱歿之日囊無餘貲平生嗜學
好問所著有江樓遺稿猶江漢隸日臨池不倦公之
先本汴人扈宋徙錢塘世業顛顛鑿始祖均厚宋太

鑿令高祖賜號金錢曾祖達祖安父益以祖業顯仕
終太醫院御醫 贈奉政大夫山東按察司僉事母
朱繼母顧俱 贈宜人配李 封宜人子二石早殤
鳳音尚幼玉泉山祖兆之左有司所營塋也其窆以

年 月 日為之銘曰

矯矯中丞博碩敦龐厚積弘敷敷歷恢張明罰慎
獄祥刑用光出秉風紀齊魯激揚晉總方嶽閩楚
又康靖共爾位經營四方天子曰咨爾維端良迺
陟臺僚作鎮南邦提師開府于贛于漳上游廓清
為國巨防功成抗䟽解組錢塘衆曰勇退迴瀾之

狂公則知止屏居相羊倚嗟中丞巖廊之望溘其
長徂乘雲帝鄉才既浮位澤不究氓恤典便蕃薦
紳盡傷墓門穹碑太史摛章遺德宿勲奕世弗忘
鬱鬱崇阡敬哉毋滅

陳都御史傳

王世貞

陳長公者名察字原習其先閩人徙常熟遂為常熟
人常熟故多豪陳豪族其人類長者高皇帝數以
法破誅諸豪首獨赦陳氏自如為其以長者故四傳
而公父光祿君隱不仕母譚淑人夢斗間氣下傳體
寤而視腹有赤文曰鳳已遂娠生公公生嶷然莊甚
動止自矩下帷日夜誦不輒補邑諸生俄光祿君切
公苦而仇酒肉之味者三年故令邑揚名甫請得屬
光祿碣曰不佞令辱誌叟以諸生賢竊知叟蓋光祿
君少子寰亦諸生矣久之公遂舉進士釋褐南昌推

官滿三載高第入為留臺監察御史尋召治臺事中
貴人瑾絃而公持議亡所屈坐罰輸粟邊百五十石
瑾後伏法殊死而義子寧彬煽起益甚公力爭不得
嘆曰死耳而不難太夫人耶是時譚淑人春秋高尚
亡恙云公移疾歸養又可九歲而會寰免檢討亦歸
譚淑人趣起公曰若母以吾老為念而遂孤天子
大息公乃起守故官俄當出按滇上䟽言天下大計
五曰備荒曰治兵曰屏盜曰水利曰民牧俱下所司
條著令寧王宸濠反義子彬說上以南方饒樂可游
上欣然嚴中外且發公抗言弄兵者陸梁彭蠡間

寧能舉大名執發三千騎渡江可徑縛取柰何屈萬
乘尊奪吏士任且上出而京師空然無六尺寄撫
監即北不憂虜不憂蕭牆內耶上不懌切責公奪
一歲奉公遂行按滇屏騶呵以身周行箚棘而微刺
民間得失滇中別產銀辛臣請縣官場而權之歲可
佐度支費什一下使者議公持不可曰此兵端也且
上以采用事者覩其利余覩其害而從吏之不可
竟罷議金齒帥沐崧挾中貴人魘而嚙公劾治如律
上亡子公䟽略曰臣越在外徼妄干國家大議死
罪死罪陛下之踵先帝稱尊者十五年矣先帝

十八年而棄群臣亡卒然之患以有 陛下也 陛下
下多狎游壯未有子群臣心怦然竊害萬一宜早定
大計擇 親賢寘禁邸端良之士屏翼左右 陛下
固萬壽無量庶有以培本根消窺伺臣民不勝大望
不報亡何 毅皇帝晏駕 上即位下詔求直言而
公還自滇數上書陳君德興革計弊復出按蜀公說
上以罷蜀鎮守及諸織造中貴人具其狀甚悉中
貴人尾得書語相銜公次骨謀格不下然 上固已
心動後次第有所裁具如公語公之按滇而蜀也一
罷青驪布袍導二吏符節而已岳守而下大懾服惴
惴亡以奉下風墨吏先公解印綬去試諸道偕計吏
者甫畢以譚淑人喪免公繇郵書中受訃即被髮跣
且號踊曰天其祝不毅得以九歲侍而易一日耶公
服除再入為御史王邦奇者壬人也例罷所任千戶
不得志緣 上意誣大學士費宏等給事中楊言因
遂亂邦奇 上恚謂為大臣遊說即朝置獄訊備五
毒公大呼曰臣察願以不肖軀易揚言地下衆錯愕
引辟而 上連目攝公不為動退復具草言亡論邦
奇語非是大臣不自飭扞文罔亡以消厭人議惟
上體貌終始其聽自効邦奇別下司寇獄彈治勿令

天下有以窺見風旨 上曰善因遂寬楊言獄弗誅
十二軍帥侯勛方挾幸為姦利巨萬公時監軍事發
其陰請賜罷上謂御史驚吾不受一勛以謝御史其
令侯就第公守御史久同列婁起大位幾徧始遷為
太僕少卿垂拜公復辭薦代人太僕於故事不得辭
又不當得薦代人坐謫潮屬邑校官公怡然卷衣出
曰察奉臺事亡狀又數妄言當僂 天子幸哀憐之
潮萬里寧謫人也於是倍道趣潮聚諸儒生譚經學
諸儒生人相勸亡倍陳公暮歲移信州倅距倅南昌
更可三十歲治如其南昌亡見遷吏態已晉浙江按
察僉事俄超為副使踰年而遷山西按察使亡何遷
山東右布政使已又遷浙江左布政使入為光祿卿
既上皇子生贈祖父官錄一子太學生吏部言南贛
闕撫臣請以陳察任報可卿三品又遷自左使當為
副都而大臣者失其名以公不先事見嘆之僅改左
僉都御史之鎮公則申先都御史王守仁束約定甲
保繕要衝勒習技射士密筭授之捕鹵盜魁盜相戒
請明吏毋污陳公質為也而公益頡 高皇帝大誥
闕里社社人給小學彬彬矣 上行且召用公然公
倦游乞骸骨辭至 上殊非所望曰都御史輕去朕

耶吾不用矣。公故受經羅文莊而友張潤章。極相與
劇切為君子。歸杜門益讀習。濂洛諸先生書。希濶外
事。監司歲時行部。間造公公度其人。長者乃已。或其
人非長者而侈。則徐出所飯。麥強飯之。曰余田父耳
也。公又多吳語。刺刺是非。咸逡巡避去。所寢即生平
不二衾。蔬肉分日而食。冠衣衲。亡易第。令綴以絲。綵
色錯然。久而失其故。少年覩以不堪。或相率摘訾公
非情。云公之事譚淑人二毛矣。于于膝間為嬰兒。慕
歲秋先其鄉人入租稅。既老病且亟。捐私田三百為
邑助。博士弟子貧者曰吾異乎。所以益子孫侈者公
卒年八十三。有集及奏草若干卷。

王世貞曰。日者余謁陳公山中也。公亡少余。而以朝
事質某某死。兵者某某諍而死。者瞿然起。齒擊曰。彼
其以余而牖下。非夫哉。則又曰。為先彼死者死。為後
彼死者死。彼何死矣。於乎陳公亦竟老且死矣。

琬琰廣錄

巡撫陝西

郭敦 嵩昌縣人

羅汝敬 江西吉水人

陳鎰 直隸吳縣人

王翱 直隸藍山人

王文 直隸東鹿人

劉廣衡 江西萬安人

耿九疇 嵩平定州人

張楷 浙江慈谿人

王 槩 江西廬陵人

項 忠 浙江嘉善人

陳 价 四川銅梁人

馬 文昇 河南鈞州人

余子俊 四川青神人

程 宗 直隸常熟人

秦 紘 山東單縣人

阮 勤 山西長子人

鄭 時 直隸舒城人

賈 奭 四川巴縣人

蕭 禎 江西泰和人

王宗彞 直隸東鹿人

張敷華 江西安福人

許 進 河南靈寶人

熊 翀 河南光州人

周季麟 江西寧州人

程 需 江西德興人

楊一清 湖廣巴陵人

張 泰 直隸肅寧人

曹 元 直隸倉山人

柴昇 河南內鄉人

才寬 直隸遷安人

賈銳 河南安陽人

崔巖 湖廣郴州人

黃寶 湖廣長沙人

藍章 山東即墨人

陳壽 江西新淦人

馮清 順天宛平人

蕭昶 四川內江人

鄭陽 直隸安肅人

王珮 直隸永平衛人

王蓋 山東濰縣人

寇天叙 山西榆次人

劉天和 湖廣麻城人

王堯封 直隸定興人

黃臣 山東濟陽人

于湛 直隸金壇人

任忠 山東登州人

任洛 河南鈞州人

袁擯 山東德州人

趙廷瑞 直隸開州人

路迎 山東汶上人

翁萬達 廣東揭陽人

柯相 直隸貴池人

謝蘭 山西振武衛人

傅鳳翔 湖廣應山人

鮑象賢 直隸歙縣人

賈應春 直隸真定人

謝九儀 山東章丘人

唐時英 湖廣盧溪人

殷學 山東阿山人

郭乾 直隸任丘人

程軌 山東臨沂人

裴紳 山西蒲州人

陳其學 山東登州衛人

張瀚 浙江和州人

譚綸 江西宜黃人

谷中虛 山東海豐人

戴才 直隸滄州人

楊巍 山東海豐人

張社河南固始人

張師載湖廣潛江人傳

楊思忠山西平定人

溫如璋河南汝州人

通議大夫四峰張公暨配陳恭人合墓墓誌銘

胡松

嘉靖戊申夏五月二十有三日四峰張公卒其孤應
梅卜以其年冬十有二月二十日葬公城東清潭先
塋之側奉里人劉約齋訓導狀請予志其墓予於公
雖後進然仕猶同朝隱偕在野習公行事為備不
可辭公諱楠字子材其上世氏族譜系無徵焉入
明為來安著姓王父而上隱於農先嚴父朴菴先生
諱綱者始徙居郡仍充學第子員登成化戊戌進士
歷官南戶部主事員外郎即中遷知岳既以忤大吏
調知貴竹之黎平府以清謹聞配馮氏公之母也公

生四歲而馮卒鞠於繼母朱恭人黎平公以公資強
識授公胡氏春秋傳卽治旁及三傳畢習甫冠卽有
聲塲屋娶邵人國子生陳文爵女正德丁卯領鄉薦
主司擇公經義式多士明年戊辰舉進士拜中書舍
人已封文林郎配孺人孺人素恭儉勤敬承公十有
九年逮事祖姑暨姑甚勤并得其歡靡有間正德壬
申卒於京還塋前域聞歸安令莆田余公女賢請繼
室焉而字已進光祿丞積數年不調輿論稱擲己卯
陞尚寶司少卿庚辰秋予告歸省 詔賜旅資寶鏹
辛巳還朝會 今上入繼大統 覃恩海內進奉政

大夫贈封陳余皆安人丁亥升大僕寺少卿內治京
營馬政兼視山海緣邊諸騎乘悉允覈聲望益著衆
意日旦夕且臺省副在九列未幾遷公 南京鴻臚
卿公安之日命酒賦詩自娛滿三載奏功進中憲大
夫母暨配加封若贈為恭人會大朝賀習儀其屬序
班某某儀少愆臺臣移文侵公已又劾公不治賴
上知公之素左遷貴州布政使司左叅議公怡然就
道無少繭時左轄以下闕員公當綰印綬適都勻苗
獠內侵勢頗熾諸衛戒嚴公出計畫督撫臣迄累平
之尋奉表入賀萬壽節道聞朱恭人疾竣事遄返侍

藥食曲殫心力喪之如母比服闋則公年既耆艾倦
致仕公性慈仁孝讓友其異母弟棠至篤厚方為諸
生一孝廟遺詔頒至郡公哭之哀不能起同舍生至
為感動其為文醇暢博衍詩務道情清潤精切有劉
文房許用晦之風平生喜賓客不事家人生計俸或
它入隨手罄弗問有無坦夷簡亮無城郭町畦樂誦
耽吟率至竟夕以是家益空至無以為殮具鄉人嘆
嗟始陳恭人有子曰應元壯有室矣不幸死踰耆而
獨以棠子應葵嗣至卒前四歲側室李氏舉子曰應
梅舉之日維蘇童牧豎咸呼於道曰張公有子矣識

者以占天道人情云女二長適郡人楊希億次適六
合袁明孫男一應葵出距生成化丙申十有一月四
日享年七十有三蓋榮且哀矣於戲悲哉銘曰
有節者山滌水環之有美者公滌人頌之頌之伊
何曾弗培剋委順瑛終好是懿德維天有監維地
有知既畜其身必豐其支鬱鬱玄窈雙玉並弄繁
千萬年爰得其所

張中丞傳

中丞張公名師載字以道號少渠潛江人也上世居博野高祖仁御史順天中謫丞潛江白湫驛因以季子端占籍潛江端生洪洪生永祥永祥生公洪永祥以公貴並贈右副都御史永祥有隱德里人稱為龍潛翁初龍潛翁年長未有嗣偕妻胡氏禱于嶽神祠夢神人以紫囊龍嬰兒見畀為公誕之夕又夢日墮胡氏懷中龍潛翁喜曰兒數著奇兆異日必大吾門公生而靈慧穎敏絕群幼就母姻蔣仕翽所從吉水朱隆誦朱氏詩日記數千言又從安福趙可約明春秋

弱冠即起名庠中嘉靖丙午舉鄉試明年登進士第
觀政刑部公魁頌磊落論議斤斤識大體與人交坦
易洞朗而中懸藻鏡或談及古今偉烈事輒欣然歆
置身其間人以是窺公不凡咸敬畏公初授嘉興令
徵拜南吏科給事中出知山東萊州府歷遷浙江按
察副使河南叅政右僉都御史巡撫保定等府提督
紫荆等關轉右副都御史總制南直隸江浙等處軍
務以疾乞歸三年起公巡撫陝西贊理軍務踰年又
以疾乞歸歸三年卒公峻挺耿介不附津要臨事飈
發務達其志雖僕巧所避奮然任之人或笑公戇公
不顧竟以此獲名初嚴氏專權多植私黨而私黨則
無不矜寵黷賄為姦邪公令嘉興即忤邑人趙氏意
趙嚴黨勢焰熾甚以其子受公春秋覲公校藝棘場
乃厚餽公公拒之厲趙恚日傾公短害公公操履慎
密終莫能害在南吏科歲當考察京職選部郎萬氏
嚴黨且姻也先屬人傳語將以庖卿遷公鈞公懼公
會議即首議萬衆錯愕相顧恐禍及日是不決公拂
衣起曰吾既以身許國尚以利害死生繫念乎諸君
無恐脫獲罪吾自當之不諸君累也遂抗章論萬諂
事宰輔毒害縉紳章上嚴大怒即日出公歸萊州萊

故疲郡多逋賦催科迨之則竄匿海島甚則聚為盜
莫可弭於是遣諸御史督天下逋賦刻二十年為期
不滿數之半者守令輒論罷意在困公耳時朱中丞
衡蔡御史結惜公賢極力庇公公得不罷而它御史
受嚴意按部乃索癘窟公久之公無可指摘乃已公
為憲副又值嚴黨鄔氏理鹽淮浙間橫恣無忌激鹽
徒聚史家莊為盜檄公平之意又欲困公公以憂去
亡何嚴氏敗趙死萬鄔謫戍銓部以公前省中刺姦
邪有忠直節擢叅政未上即擢中臺右丞向之儂巧
畏避者堙泯無聞而公之令名彰彰揭於海宇非大
丈夫偉烈事哉公為守令著循良績在嘉興釐奸滯
蠹歲減運艘數千金覈畝平徭民翕然稱便在萊州
廣諏民隱扶弱抑豪裁帑役濫供之苦萊歲輸布遼
左遼左饑或議以粟代布公力爭不可當路不能奪
萊舊養馬弘治中撫臣疏萊疲免養馬代房郡輸糧
詔許為制或議均馬於萊公又力爭不可事遂寢公
疆毅敢言山立不可撼如此事載劉都諫祐王主事
肇林去思記中公抱經畧宏猷撫保定特妖人李學
詩潛結陝西李軋四川蔡伯貫稱亂僭號改郡邑名
騷震京師公掩捕渠魁三百餘人事聞法司擬反叛

族誅公疏赤子弄兵潢池罪抵盜律免族誅者萬餘人公陰德厚矣公撫陝西討妖賊何勉兩擊虜寇勉蔡妖黨也流入漢中殺掠為害前陝西巡撫調邊兵會四川鄖陽兵合征之不克公乃募勇懸賞設策握奇勉就戮餘黨悉平虜酋吉能犯靖虜營公遣中軍白允中等分道邀擊之虜敗走已又糾別部犯塞甚急公選精銳乘夜擣虜湟中斬獲無算虜大懼遠徙不敢近塞捷屢上屢賜金幣邊人誦公功至今不衰公興利皆久遠計在輔畿立社倉廣儲餉教民鑿井溉田又為垣塹延袤數千里備不虞在閩陝麓會城濬鄭國渠蓋遺惠來世云公以疾告歸闕一小室焚香兀坐靜攝天和以期永年乃竟不起可悲已余聞士君子進退有命而持蹈不可不謹公始為嚴氏所啣數數困公將快心焉而公不困公在告慎疾善調朝野颺颺然望公弗藥 天子將大用公而公疾竟不愈莫究厥施豈非命邪然公持蹈則終其身無損可謂完節全名矣公享年六十妻羅淑人處士某女繼魯淑人鄉進士嘉女司成文恪公鐸孫女也子志學國子生敦禮遵度能世公之家公既卒 天子悼公頒卹典勅有司祭葬志學屬余為傳往歲丁酉余

同年交郭君岱丞稱公碩學篤行為邑令高君應經所重余心識之公司諫垣余益聞公名歲癸亥余憂居公應詔起家紆道過應城唁余媿媿談不竭余伏苦塊無以答公公惻樸長厚不存矜域喜譽人善休休具大臣量每注心於海內擯棄放逐之名流惟恐其老死不收叙而妨賢怙位之夫則所鄙醜不屑道與余談直傾肺腑無偽余雖不答公然竊羨公有古人風今之世不可多得公與京山王御史宗茂同登第王首論嚴氏公繼其後二公骨鯁之名聯輝楚牒世有慕公誼者當證於余言

琬琰廣錄

巡撫寧夏

羅汝敬

江西吉水人

陳鎰

直隸吳興人

郭智

直隸蕪湖人

金漁

直隸山陽人

盧睿

浙江東陽人

羅綺

河南磁州人

韓福

山東昌邑人

陳昱

直隸虹縣人

陳 价 四川銅梁人

張 瑩 直隸華亭人

徐 廷 璋 河南羅山人

張 鵬 直隸涿水人

賈 俊 直隸東慶人

崔 讓 山西石州人

張 璋 直隸景州人

韓 文 直隸新城人

孫 仁 江西新淦人

張 禎 叔 四川巴縣人

王 均 山東曹縣人

劉 憲 湖廣益陽人

冒 政 直隸泰州人

曲 致 山東萊陽人

安 惟 學 山西臨汾人

馬 炳 然 四川內江人

張 勛 直隸完縣人

馮 清 順 天宛平人

邊 憲 直隸任丘人

鄭 陽 直隸安肅人

王 時 中 山東黃縣人

張潤 山西臨汾人

張壻 直隸晉州人

林琦 順天大興人

孟洋 河南信陽人

李璋 浙江景寧人

毛伯温 江西吉水人

翟鵬 直隸撫寧人

胡東臯 浙江餘姚人

楊志學 湖廣長沙人

王崇獻 山東曹縣人

張翰 遼東廣寧人

張文魁 河南蘭陽人
誌銘 韓邦奇

吳鎧 山東陽穀人

楊守禮 山西蒲州人

劉勳 福建莆田人

范鎮 江西樂平人

張珩 山西石州人

李士翱 東長安人

王邦瑞 河南宜陽人

張鎬 直隸定州人

王夢弼 山西代州人

王 鐫 直隸深州人

霍 冀 山西孝義人

謝 淮 直隸任丘人

毛 鵬 直隸藁苑人

王崇古 山西蒲州人

朱 笈 直隸桃源人

都察院右副都御史張公墓誌銘

韓邦奇

正德戊辰余與公同登呂拱榜進士識公於南宮後
十餘年同官於晉陽撫臣當歲薦凡藩臬皆列奏牘
而余與公獨弗與余時致仕將歸公憮然抵余書曰
君茲歸矣文魁退且未能進則弗達將若之何哉余
復公曰或去或不去歸潔其身而已矣公翻然曰我
道無怨無尤餘將付之天也後余起撫晉陽公亦撫
朔方未幾皆乞歸比余起總河道方擬得再晤而公
已卒云悲夫公姓張氏諱文魁字元甫別號字川河
南開封府蘭陽縣人也其先本山東單縣人勝國之

季高祖長公者避兵蘭陽因家焉曾祖宗信贈通議大夫都察院右副都御史配某氏贈淑人父讓運運所大使封承德郎刑部主事贈奉政大夫按察司僉事加贈通議大夫都察院右副都御史配畢氏封安人贈宜人加贈淑人初弘治辛亥公方垂髫河決城舉家舟而覆恍有朱衣人掖公泊於林杪以免弱冠補縣學生正德丁卯鄉試中式戊辰登進士授刑部陝西司主事時權瑾流毒縉紳衆爭以苛刻冀自免公獨多平反人皆危之弗恤也既而連丁內外艱服闋赴部冢宰曰是權瑾時執平主事耶陞刑部山東司員外郎平反如主事時陞山西按察司僉事巡冀北道初大同當權幸隨駕經過之後地方官緣為姦利至是巡按張侍御英檄公勘之公按都指揮章傑宋文剋削軍資十四萬褫其職竄巨猾陳萬尚寧於炎荒既而督脩沿邊險隘身往臨巡嘗遇伏虜於橋頭堡公以護兵直前迫之皆遁去胡中丞錠薦公才賜帑金十兩陞布政司左叅議復守冀北首疏宗室聰濶長史趙寬太監王哲總兵楊玉數十家之橫罪其黨二百八十餘人權勢斂跡覈追豪商蘇霑逋稅八萬餘金皇店李瑀逋課十萬餘金充軍儲又閉大

同關王廟以釐請罪之俗毀瀋府聖母祠以絕給緣之妖揚中丞志學俞侍御集皆謂公宜民之仁足餉之才擊強之威可方古人云陞陝西行太僕寺少卿大同總副雅重公鞍馬金器馳賀於陝公曰吾不以易地易界也卻之陞苑馬寺卿裁革豪強私買私賣之弊馬政以清勅有廉靖不苟淵塞有猷之獎陞山西布政司右布政使尋轉山東左使革堂食裁冗費羨餘月計千餘金別貯以資海道備倭之用揚太史維聰謂公直諒之心剛方之氣清苦之操淹貫之學經綸之略實有人所不可及者云適寧夏撫臣告缺

庭議以公久歷關陝大同陞都察院右副都御史建節朔方虜三八公指畫方畧捕斬四百餘名顆捷聞凡三拜白金文綺銀牌之賜陞俸正二品唐吏侍龍謂公兼度策勲儼然為疆場之鎮夏人管黃門律亦曰夏州撫臣剛折而柔廢惟公不茹不吐得撫臣體云嘉靖戊戌春虜困夏游擊於宴官湖公得報自率大眾援之虜始遁因襲寒感疾力求解任不允會大慶推恩封通議大夫誥有鎮危立利比於南仲之詞於是信公某淑人讓公畢淑人皆獲封贈廕一子入監乃有不悅公者罷公節鉞俾叅知行者政事公力辭以

都御史致仕云既歸杜門謝客鳴琴賦詩時召親故子弟能文者考德問業終日不倦偶晨興曰何錦衣甲馬者充斥吾庭耶居數日乃卒云公生於成化己亥九月二十七日卒於嘉靖二十一年七月十九日享年六十有四訃聞特遣河南布政司孫左使存諭祭有式揚風紀屢獲戎功爰念徃勞良用悼惜之文兼賜帑金二百兩夫匠一百名襄葬事飾禮備物制也維公聰察沉毅剛直果斷內行修謹雖隆夏未嘗裸體晏坐盛怒未嘗撫案大叱嚴於嫉惡見吏之貪汙者如仇讐然服善休休若已有之陸太史鉞

謂公氣清而貌癯身若不勝衣而中剛有制至臨大事決大疑確不可移去配許氏繼配王氏俱贈安人淑人繼配郭氏封淑人子二長九德早卒娶表氏以貞節顯次三綱官生娶表氏三綱將以是年三月初十日葬公於縣西十五里之白雲山來問銘銘曰

都丕休哉大河之濱混混淵淵篤生偉人侃侃按察為牙為軼昔彼憑城今成窟黜廉靖不苟淵塞有猷公拜稽首對揚皇休羨餘是蓄乃去堂餐清苦之操揚太史言天子命我仗鉞西疆首功四百我伐用張皇三錫命金幣斯承惟公大作益

之十朋爰念往勞 天子悼惜飾禮備物用光寔
宥傳有太史勲有旌常維千百年並視銘章

琬琰廣錄

巡撫甘肅

羅汝敬 江西吉水人

羅亨信 廣東東莞人

徐晞 直隸江陰人

蔡車 浙江錢塘人

王驥 直隸束鹿人

曹翼 湖廣蘄州人

程富 直隸欽縣人

陳鎰 直隸吳縣人

馬昂 直隸滄州人

宋傑 直隸定興人

芮釗 順天寶坻人 狀 韓雍

吳琛 直隸繁昌人

徐廷璋 河南羅山人

婁良 河南通許人

朱英 湖廣桂陽人

宋有文 四川資縣人

王濬 直隸威縣人

王朝遠 江西進賢人

魯能 廣東新會人 碑銘 丘濬

侯瓚 直隸雄縣人

唐瑜 直隸上海人 誌銘 李東陽 碑銘 徐溥

羅明 福建南平人

王繼 河南祥符人

馮續 山東昌邑人

許進 河南靈寶人

吳珉 山西靈石人

周季麟 江西寧州人

劉璋 河南都衛人

畢亨 山東新城人

曹元 直隸含山人

才寬 直隸遷安人

胡瑞 河南內鄉人

張翼 山西介休人

趙鑑 山東壽光人

李昆 山東高密人

鄧璋 順天涿州人

許銘 直隸吳縣人

陳九疇 山東曹州人

寇天叙 山西榆次人

李珏 直隸開州人

劉天和 湖廣麻城人

唐澤 直隸鉅野人

趙載 山西垣曲人

張漢 湖廣鍾祥人

牛天麟 山東聊城人

丁汝璣 山東德化人

陳卿 四川宜賓人

底蘊 河南考城人

詹瑩 福建龍溪人

趙錦 順天良鄉人

傅鳳翱 湖廣應城人

楊天博 山西蒲州人

王誥 河南西平人

魏謙吉 直隸柏鄉人

陳棐 河南鄆陵人

胡汝霖 四川綿州人

戴才 直隸滄州人

石茂華 山東益都人

王輪 山西蒲州人

楊錦 山東益都人

廖逢節 河南光山人

禮尚義 婦人母陳氏有賢行公自幼天性警穎

父母口授以書即成誦稍長遣游邑庠讀書績文大

有造詣遂以書經領正統戊午京闈鄉薦明年會試

禮部中乙榜例當授校官公不屑就卒業太學壬戌

登劉儼榜進士觀政都察院維特憲綱新進初任不

得授御史而掌臺事者亦剛嚴少許可然見公在諸

...

趙錦 順天良鄉人

傅鳳翔 湖廣應城人

楊博 山西蒲州人

王誥 河南西華人

魏謙吉 直隸柏鄉人

陳集 河南西華人

廖無 河南西華人

王鏞 山西襄垣人

王鏞 山西襄垣人

都察院右副都御史芮公行狀

韓雍

公諱劉字宗遠姓芮氏其先應天溧陽人曾祖諱宏甫祖諱仲琚世有隱德父諱琦徙家順天之寶坻好禮尚義鄉稱善人母陳氏有賢行公自幼天性警穎父母口授以書即成誦稍長遣游邑庠讀書績文大有造詣遂以書經領正統戊午京闈鄉薦明年會試禮部中乙榜例當授校官公不屑就卒業太學壬戌登劉儼榜進士觀政都察院維特憲綱新進初任不得授御史而掌臺事者亦剛嚴少許可然見公在諸進士中姿宇魁梧風裁凜凜不能不屬意迺登諸進

士試刑書月再試公每列上第掌臺事者深器重已而朝廷以御史清要之官不可以他途雜進亦注意進士臺憲因入奏考選進士二十有四人為御史兩京公在首選為河南道授承事郎河南道分隸皆劇司且司考覈京師郎署以下及畿內百職事未幾公掌道事刑政清肅考察明允他道缺御史守篆者亦付公兼理一時聲名籍籍動朝野甲子奉命按治遼東既歸復按河南所至風稜峻整憲紀修飭鋤強擊貪不少寬假將吏士民畏之如神明貪墨吏有望風解印綬去者已而復按治江西江西地大民

衆詞訟填委素稱難治公至布條章謹約束抑強扶弱令行禁止於是境內大治吏畏威而懷德嘖嘖稱頌以為前此所未有既代歸人皆眷戀不忍捨景泰庚午公受勅命進階文林郎及封其尊公為文林郎河南道監察御史母陳為孺人未幾朝廷知江西之人思公不能置遂拜公江西按察副使時壬戌進士百五十人未有登金紫者金紫自公始士君子莫不嘆羨公至部凡所激揚繩糾有加於前聲稱益大振幸未以外艱去位江西十三郡之人羣訴于按部使欲公奪情以圖終惠按部使以聞值禁例不果

遂得終制甲戌陝西右布政使闕員天官以關中地
重民夥且供餉三邊承宣之官非素有才望者不克
稱迺薦公於朝往蒞厥官公夙夜孜孜烏區畫撫
綏邊儲充足民庶安止一時論天下賢方伯必以公
為稱首明年進左布政使德政益修人無間言天順
丁丑今上復大位慎選臺憲且以整飭邊備非臺
臣不可遂召公入朝拜嘉議大夫都察院右副都
御史食從二品祿授以璽書命巡撫甘肅公至鎮
感上知遇勞心焦思知無不為勤練習謹斥埃精
器械廣儲畜分兵禦要害而復籌兵民利害而罷行
之灼將吏勇怯言於朝而進退之武備大修百度
咸貞邊人愛戴而畏服雖古名方鎮莫或過之庚辰
丁陳孺人憂朝廷重邊計命公奔喪歸且遣官
賜葬祭襄事畢還鎮辛巳虜酋孛來悉眾寇涼州公
提兵突入涼州嚴守備與虜相持時出奇兵戰虜或
踐蹂虜營斬獲甚眾虜驚懼不敢近復分其部落寇
莊浪甘肅諸處道路梗塞人情憂疑公隨機應變分
兵勦襲所向克捷虜輒遁走凡虜出沒諸處幾一載
而城守無虞兵威不挫虜卒氣索奔北致數千里之
境廓然清寧論者以公運謀鼓勇經畧指示之功居

多 朝廷方行報功之典而公不起矣壬午九月三日也中貴總戎歸其裝惟衣冠簿書而無纖介私物衆莫不服公之操守不可得計聞 上為悼惜其子壻往迎輿特給驛以行既至復遣官賜祭及營葬事公生於永樂 享年五十有 娶許氏邑之名家女懿德克配封孺人子男幾長誠為醫學訓科次某女幾人國子監生張壇其壻也孫男幾孫女幾公葬在卒之明年 月 日其地在邑之東原嗚呼雍與公生同郡舉進士同年觀政都臺同道拜御史同日後奉使于外數同處茲復同進位都臺且心同道同知公行誼之詳誠莫予若也然以公之才之德天下士大夫如雍之相知者方期公握臺章登卿輔以大厥施而公竟止於斯豈非命哉用枚淚錄公行實之槩為狀以同名筆據而採焉謹狀

都察院右副都御史魯公神道碑

丘濬

都察院右副都御史古岡魯公奉

璽書巡撫甘肅

間父喪歸守制行至西安卒於閩內道公署訃間

朝廷遣官諭祭命有司營葬事其子文衡持戶部侍

郎李公克承所輯狀來乞銘予與公同生嶺南偕李

公登甲戌進士第是歲鄉人聯名者十有六人官至

臺閣者惟予三人又何都憲宗易也四人中予齒最

長而公乃先予逝予叨以文字為職業所以序公行

事而銘于墓隧之碑者奚辭以拒哉公諱能字千之

其先宣之涇縣人曾祖諱寶通以民民守宣城為隊

長始調戍新會祖諱保輓父諱真號素軒以儒書教授鄉人子弟初封承德郎戶部山西清吏司主事進封奉直大夫山西清吏司員外郎母周氏繼母陳氏初贈安人進贈宜人皆以公貴也公生而秀朗端重受教于家庭不勞而成甫成童選入邑庠補弟子員景泰庚午以尚書領廣東鄉薦明年試禮部得乙科不就卒業大學歲甲戌登進士第觀政工部奉命往秦府營永興王葬事締造有方事舉而民不擾為親藩所重歲丙子除南京戶部四川司主事事比諸司為劇公處之裕如一時能名聞于南畿尋丁內艱

服闋政任戶部山西司主事尋擢員外郎未幾陞湖廣司郎中公在部歷三任踰十年久於其任司無滯事大為上下所敬服時古濠年公為尚書蒞屬嚴甚少有當其意者獨重公繼以長安楊公九所加禮諸司有疑事亦或以質於公公時發一言多中肯綮歲癸巳陞公陝西布政司右叅議時部官至正郎者意希^布政叅政之職得亞叅者輒不喜時人多為公惜公欣然曰方面之佐分屬釐務大叅與亞叅等耳居官以盡職為忠恐不克稱耳何必計資級哉戊戌進右叅政庚子陞右布政使辛丑轉左公自部屬出官藩

服八年之間凡四轉官階位方伯當方面之寄關陝
重地三面臨邊巡守都憲四人總戎大將四人其他
監軍叅將之類何啻十餘人屯聚戎馬十數萬控制
羌狄糧餉百需皆取給於藩司又值邊陲多事內地
水旱相仍非有諳練之才見事明決者不能一朝居
也公為佐貳時在任之日少行邊之日多凡諸西北
一帶山川扼塞屯堡要害儲峙多寡兵馬強弱將士
堅脆皆能心憶而口數之既總方伯之任不暇一一
躬蒞之慨然謂僚佐曰陝西一藩沿邊數千里屯重
兵之處其大者寧夏榆林甘肅其他若岷洮等處營
寨非一北禦鞬鞞西接羌戎外地有生藩內地有熟
羌所以控制之者雖在乎武將然數千里之地數十
萬之兵所餽之馬所食之粟所用度之軍需皆出乎
民也苟非未事之先豫有以會計之臨用之際何所
藉手哉乃市近司地以易叅議定創為會計堂六楹
凡錢糧出納條例簿藉咸度其中每歲夏秋當徵稅
糧之際會諸僚佐於此稽考凡一歲之所入與一歲
之所出目登耗以加減量遠近以分派用是筭無遺
策邊儲有備歲用不屈而民力亦不至於困斃焉甲
辰關內大飢民至相食時公私罄竭計無所出會

朝遣大臣賑濟行一切權宜之政公勞心焦思隨事
裨補委曲詳盡一方之民得以少蘇者公之力為多
癸卯述職赴京一時方伯數公為最明年甘肅巡撫
都憲入貳夏官時論謂非公不可 朝廷擢公都察
院右副都御史仍支二品俸錫以 璽書付以便宜
之任往代之公即時上道昔公父行素翁年幾九十
公命其子文衡等南歸侍養惟携一童自隨至甘肅
首述 朝廷德意以諭將士人人感悅於是條為合
行事宜凡十曰新號令曰謹練習曰修城堡曰明賞
罰曰覈功實曰抑虛詐曰恤孤寡曰稽儲積曰行賑

貸曰撫番落行下之日軍民翕然歡呼載道咸曰數
十年無此也方將翹首跂足以望新政甫三閱月而
行素翁訃音至矣軍民大失所望相率赴 闕上章
乞留時制守邊大臣有故非得代不許擅離公以墨
衰從事者又三閱月代者乃至歸至會府而卒時歲
乙巳八月七日也距其生宣德戊申得年五十有八
公娶羅氏初封安人進宜人子男二人長即文衡次
文鑑女四人長適邑庠生伍鴻次在室次適指揮倪
麟次適義官鍾珠文衡以其年 月 日葬公于某
山之原公生嶺南北仕于 中朝官兩京歷三職皆

專錢穀之任既而出受方面之寄乃在西北戎馬之地凡首尾十有三年所以布宣朝廷德意以安生民備邊備給軍餉者克舉其職而又屢曹荒札之歲民不聊生之時乃能因時制宜補偏救弊以舒一時之急凡所經畫多出人意表不動聲色而所至成功朝廷方大用之衆方望其有為而遽止於斯惜哉銘曰

公生南紀顯于西陲內撫疲民外控黠夷曰夏曰涼于岷于岐宦轍所至功業隨之所最著者賑民之飢生其垂死奠其將移凡此方民子母夫妻有

田有廬非公功誰昔寶安羅曾述于茲亦吾越產建功孔竒去世已久邊人猶思公今繼之巔嶠有輝孰云將才專出于西前羅後魯曰人口是碑公身雖逝公澤長垂後人考德眎此銘詩

都察院右副都御史唐公墓誌銘

李東陽

公姓唐氏諱瑜字廷美其先晉陽人在宋有曰子方者為御史中丞高祖諱英 國朝洪武初為上海稅課局大使始居松江大父諱以忠弗仕父諱昭累封中議大夫贊治尹衢州府知府母張氏繼母沈氏皆封恭人公器字凝重失恃時財九歲事繼母如所自出十五遊邑庠以尚書舉正統丁卯鄉試登景泰辛未進士第拜南京禮科給事中趙都督者有罪公劾寘于法甲戌京師饑分地給食活者甚衆天順丁丑以繼母喪歸辛巳擢知衢州府詢察利病惟民所便

其俗健訟示以廉明民無敢欺者縣有孔氏別族為
民所奪以私財贖其租使共祀事其子孫德公圖像
于家廟生饗之石塘洪浮橋壞為舟以利病涉癸未
旱疫為文禱于神雨大作沴氣遂消甲申洎成化丁
亥數值旱禱雨輒應民勒石紀其事有李延者為媒
匿人聘金粥二子以償不足又市其妻公聞而嘆曰
民窮而犯法畏法而棄妻子典守之過也贖歸之龍
游張福戒吳氏四人事覺以誣金氏已誣服公疑其
枉別置于獄以甘言誘之夕始得實乃釋金而罪張
民相驚稱之曰神其為士者賦十詩頌之將去有千
人詣闕乞留不得老稚攀送至不能行後民立生
祠及去思碑于府學辛卯進湖廣左叅政分按荆襄
置廩積穀值歉發若干斛鈞房流民當散歸者公給
餼解繫俱獲生還甲午荆湖水溢民四出逃溺公發
舟載鹽米給之襄河為患作隄障之民名其隄曰唐
公隄京山舊無城公始議修築士亦賦十詩如衢州
乙未擢山西右布政使取道歸省遂居父喪丁酉改
雲南右布政使尋復遷左布政使奏立祠祀王忠文
公禕正土官宗泐以定傳襲憫邊兵貧米價貴則給
米賤則易以銀時悉告便蒲蠻弗靖親為榜諭皆聽

命辛丑以大臣薦巡撫湖廣壬寅薦河南癸卯薦貴州甲辰薦本藩乙巳薦為兵部侍郎皆弗果為御史所旌封及再世丙午遷都察院右副都御史巡撫甘肅訓練調度若素習兵事者以其俗輕生特嚴法制出戰者卹其家死事者請賜祭以奉命與御史錄囚多所平反詔使至諷織細毳充貢獻費至數倍公執不從復有武臣被黜者競為陰中遂坐劾以去時論惜之弘治壬子以建儲詔復故官致仕甲寅八月三日疾革至十八日奄然而逝壽七十二娶尹氏封恭人先一年卒子六長鉞國子生次鏞鎧銓皆輸粟授松江守禦千戶鎡縣學生夔亦千戶出繼長兄瑾女五四適名族孫十二長隆亦輸粟如鏞等官次輅啓政格牧敕汶澂元福梟孫女十五玄孫二紹宗兆祥玄孫女亦二乙卯某月某日葬公于周涇之陽公生而秀偉喜怒不色見事親終慕待羣從子弟有恩尤善吟咏所著有學吟稿拙菴集滇南雜稿若干卷藏于家卒之三月孔氏子孫暨諸耆老來弔哭竟日乃去公在雲南陳備邊五事在甘肅陳時政兵備各五事及凡所請事宜前後五十餘卷多見施行論治體者皆稱之銘曰

仕有失得聖不謂命有失若得亦詎非正世豈無
得匪求則競厥終孰多公有遺慶慶不在大公族
斯盛盍觀厥成以俟天定

都察院右副都御史上海唐公神道碑

徐溥

都察院右副都御史唐公諱瑜字廷美其先晉陽人
宋御史中丞子方之後高祖諱英洪武初官松江上
海烏泥涇稅局子文祥因占籍上海大諱忠不仕
考諱昭以公貴初封徵仕郎南京禮科給事中繼封
中議大夫贊治尹衢州知府公姿貌瓌偉有奇氣為
詩文操筆立就以書中應天府鄉試登景泰辛丑進
士授南京禮科給事中蹇蹇不阿選知浙江衢州府
九年擢湖廣右叅政遷山西右布政使未行丁外艱

服闋改雲南未幾擢都察院右副都御史巡撫甘肅
公之守衢也詢民間利病以次行罷衢人大悅會歲
久旱且疫公還自朝覲下車即宿城隍廟自為文以
禱三日雷雨大作後凡值旱禱輒應吏民相與勒石
于周宣靈王廟舊有孔子祭田奪于民公以俸贖還
之俾世供祀事有假媒聘贖財既而懼公之威驚其
二子及妻以償公曰民窮而犯法畏法而棄妻子守
之過也贖其妻子還之衢號健訟公決斷如流數辨
疑獄民遂不敢期公去衢衢人為立生祠祀焉其在
湖廣京山隄襄陽河置廣儲倉歲飢民賴以不徙正

雲南土官世絕襲法以絕事訟定滇糧給散之宜甘
肅兵政久弛至則陳時政四兵備五罷叅將田廣奏
起才將許寧李興勞邊軍卹陳亡邊人疎然會中貴
人以事諷公不從廣等從而媒藥之竟坐事去弘治
五年詔復公故官致仕七年八月十有八日卒于家
春秋七十有二公娶尹氏封恭人先卒子男六越國
子生鏞鎧銓夔俱授松江守禦千戶鎡邑庠生女五
孫男十二人孫女十五人以某年月日葬其鄉周涇
之陽公為政所至見紀有冰玉十詠有湖藩十政有
勤民倡和集士類懸恩集其年也衢之父老及孔氏

子孫擎舟千里來哭者不絕於乎公雖不能與時順
隨不克究其施然其愛在民其功在邊公論在士夫
是其不可泯者吾故用越請為文及銘碑刻諸墓道
以示來世銘曰有禎而哲人中英少登甲第華簪纓
入科出郡封專城浙水東下流芳聲邦人祀之死猶
生楚晉大國藩垣并甘棠蔽芾多頌聲擢為憲帥提
邊兵羗胡萬里勞經營除奸糾慝聞者驚 釁竊法
來相仍一官棄去一羽輕當時物論洵不平蓋推事
定信有徵况乃壽考無康寧生而全歸沒有靈九峰
嶢巖三泖清千秋百歲垂儀刑後欲知之考茲銘

琬琰廣錄

巡撫遼東

李

濬

山東武定人

王

翺

直隸鹽山人

李

純

京師鎮南衛人

寇

深

直隸唐縣人

劉廣衡

江西萬安人

程

信

直隸休寧人

胡本惠

直隸銅陵人

滕

昭

河南汝州人

岳

瓚河南祥符人

傳李濂

張岐 直隸興濟人

李秉 山東曹州人

袁愷 河南魯山人

彭詎 廣東南海人

馬文昇 河南鈞州人

陳鉞 直隸獻縣人

王宗彞 直隸東鹿人

左鈺 直隸阜城人

劉濬 河南安陽人

徐貫 浙江淳安人

張岫 山西安邑人

張玉 直隸吳橋人

陳瑤 廣西全州人

韓重 苗絳州人

張鴈 山東歷城人

馬中錫 直隸故城人 誌銘 新貴

劉璋 順天涿州人

劉璫 江西安福人

李貢 江西吉水人

王彥奇 四川雲陽人

韓福 陝西西安人

王憲 山東東平人

彭澤 陝西蘭州人

袁經 湖廣寧鄉人

張貫 直隸蠡縣人

張禴 順天平谷人

李承勛 湖廣嘉魚人

張璉 陝西耀州人

張雲 河南信陽人

潘珍 直隸婺源人

成文 山西文水人

周叙 湖廣九溪人

王潮 直隸丹徒人

呂經 陝西寧州人 表 韓邦奇

韓邦奇 陝西朝邑人

任洛 河南鈞州人

劉漳 湖廣黃崗人

劉儲秀 陝西咸寧人

孫禮 直隸合肥人

顧遂 浙江餘姚人

董 珊 陝西膚施人

盧 蕙 直隸山陽人

於 教 陝西岷州人

胡宗明 直隸績溪人

李 垵 直隸開州人

蔣應奎 山東同人

許宗魯 陝西咸寧人

江 東 山東朝城人

蘇志臯 順天固安人

路可由 山東曹縣人

侯如諒 山西太原人

吉 澄 直隸開州人

王之誥 湖廣石首人

劉應節 山東濰縣人

張西銘 山東濱州人

魏學曾 陝西紫陽人

李 秋 順天薊州人

毛 鋼 順天薊州人

張學顏 直隸肥鄉人

金都御史岳公傳

李濂

岳公璿字文璣河南之祥符人自幼以穎敏稱博學善辭令景泰庚午鄉舉明年辛未登進士第選授南京山西道監察御史丙子三載考績進階文林郎錫之勅命天順元年丁丑英廟復辟銳意維新之化乃妙簡天下賢俊分任百職尤屬意東南諸大郡而公以才望擢知湖州府下車首詣學宮謁先師孔子矚廟學並廢弗庇風雨公喟然曰廟敝如茲何以妥靈學敝如茲何以造士乃諭郡中好義者咸助資脩之而先捐已俸為之倡復擇諸生耆民篤實勤敏

者命之監督工役馬逾年落成舊時春秋丁祀樂舞
久廢公敦延太常嫺于樂舞者董正大成之樂以肅
祀事觀者為之改容郡有何山晉何楷讀書處在道
場山之西南麓宋安定胡先生寔葬於此公曰斯郡
為安定先生教化之地而墓在境內吾不可不往謁
之至則封鬣荒涼樵牧擾擾乃考定侵界而封樹之
禁樵采者弗得入故有表思堂碧澗菴乃祀先生之
所亦皆廢乃又捐俸為倡而僚佐以下洎郡中士大
夫皆樂為之助立神道門開淤塞路構堂六楹追蹤
表思碧澗之制以嚴先生之祀君子以為有裨風教

云郡城之內有水橫貫於南北曰雲溪溪之上游有
長橋焉名伏龍橋又名東駱駝橋寔往來所必由者
故有橋以木為之屢脩屢圯公建議曰木橋非經久
計也乃易以純石環以三洞規制宏偉民至于今利
之先是湖州屬邑田賦科額不一而加耗無定則吏
胥詭弊滋甚公疏其利病于朝乞每畝正賦外加
耗一斗餘瑣瑣罔民者悉蠲去制曰可遂著為令
郡邑稱便公在任九年民懷其惠成化丁亥考績受
誥命進階中憲大夫尋擢山東左叅政未三載聲
稱著聞超擢都察院右僉都御史巡撫遼東南履任

遽卒時辛卯七月也得年五十有二所著有仕優小
稿公襟度恢廓不屑屑細故臨民以寬弗事苛刻而
事亦無不舉者故所至人思之
論曰余曩會司空歸安蔣公瑤於夷門時公以副都
御史巡撫河南亟口稱岳湖州政蹟之良以為今不
復可見且曰岳在湖州則為名宦久已祀之學宮與
安定胡先生聯俎豆蓋胡以教岳以政也其在祥符
則為鄉賢宜與韓伯俞聯俎豆蓋韓以孝岳以忠也
余歎賞其言今開封郡學祀岳公於鄉賢祠寔奉蔣
公檄云嗟乎岳公歿殆八十年其家衰削無應門之
童余為諸君子作傳數向其家索事實片紙無有也
聊據所聞於父老之口及湖州士大夫所稱者書之
其為南臺御史及山東叅政時事亡可考姑闕之以
俟知者

都察院左都御史東田馬公墓誌銘
嗚呼此東田馬公之墓也公諱中錫字天祿號東田
先世大都人曾祖歸義驛丞周始居故城祖顯父處
州知府常以公貴俱贈右副都御史祖母胡氏妣姚
氏俱贈淑人繼母朱氏封淑人公幼穎敏不凡處州
公先為唐府長史以直諫忤王掇送京師公時童穉
已能隨母走訴于朝得白成化甲午舉鄉闈薦第一
乙未登進士丙申拜刑科給事中遇事敢言兩被杖
于朝不為變中貴汪直勢張甚人莫敢犯公力陳其
不法十餘事汪怒欲中傷之滿三考竟無一隙可乘

東田馬公墓誌銘
公諱中錫字天祿號東田
先世大都人曾祖歸義驛丞周始居故城祖顯父處
州知府常以公貴俱贈右副都御史祖母胡氏妣姚
氏俱贈淑人繼母朱氏封淑人公幼穎敏不凡處州
公先為唐府長史以直諫忤王掇送京師公時童穉
已能隨母走訴于朝得白成化甲午舉鄉闈薦第一
乙未登進士丙申拜刑科給事中遇事敢言兩被杖
于朝不為變中貴汪直勢張甚人莫敢犯公力陳其
不法十餘事汪怒欲中傷之滿三考竟無一隙可乘

陞雲南按察司僉事以憂不赴服闋復除陝西僉事
督糧延綏革歲例公使錢不受弘治己酉以監陝西
鄉試為吏部尚書三原王公所竒改本司提學陞副
使壬子召為大理寺右少卿時南京內守備蔣琮擅
興大獄朝廷兩遣官廉問弗能決公請行盡得其情
乃抵之於法乙卯陞左少卿丙辰陞右副都御史巡
撫宣府首革門下工技諸匠奏罷將官之奸橫者三
人不使播毒於下府官利故為勢家擅奪者悉禁革
之又疏諸入關者率詣巡撫給符驗如後府式邊弊
肅清而萋斐之言興矣己未引疾謝事家居七年足
不及公府築西菴以自適若將終身而朝薦之不已
自給事中張文御史費鎧知府施槃前後至十三疏
吏部亦以為言乙丑冬今上命巡撫遼東公以邊軍
屯田多為勢家占種而仍代納子粒廼疏其弊力請
還之軍鎮守招商市馬漁民利公一裁以法謫其黨
尤用事者一人戊廣東遼人大悅丙寅陞兵部右侍
郎轉左侍郎逆瑾腹心有冒功請官者公弗可瑾憾
遂矯詔改南京工部左侍郎尋勒致仕瑾怒未釋廼
以遼儲損腐追罪巡撫為名即公家械送遼東獄遼
人雅德公願代償者盈路公曰如此將重吾罪固謝

之盡賣田廬貸親知以償久之號為民庚午瑾誅上
復起公巡撫大同革弊任怨如在宣府遼東二鎮名
益重明年山東劇賊劉七兄弟暨齊彥明楊虎等起
跳梁近甸兩河間猖獗甚師征久無功廷議咸謂非
公不能滅賊廼以惠安伯張偉為總兵陞公右都御
史往督軍務公兼程至首敗賊于彰德又敗之于河
間泊頭陞左都御史已而賊勢轉熾公遣叅將宋振
棟棗強振逗遛弗前賊屠棗強知縣以下死者七千
人公乃單車入賊壘諭以禍福欲不事兵革招徠之
賊懼聽感泣公遂以賊願聽招撫奏聞俄而賊焚劫
如故言者劾公為賊愚誑以重民禍廼并偉俱徵下
詔獄繫凡八越月感疾卒實壬申五月二日也年六
十七配吳氏繼林氏俱累贈淑人子男一曰師言娶
孫氏太僕少卿緒之妹女三庠生呂韶國子生戈霽
義官裴佐其壻也孫女二公天性孝友事繼母能得
其懽撫諸孤姪有恩居官剛介不受私囑其子當廢
或請援例陳乞公曰乞字豈宜出吾口竟弗乞慷慨
尚義揮金如土苴博學工詩豪於文語多竒麗可傳
尤長四六所著有甘陵志族譜箋經寓言宦跡所至
各有藁師言將以卒之年六月初十日葬城西先塋

之次痛公志弗白以死奉少卿狀泣請銘墓嗚呼若
公者氣節才望雄偉竒特足以聳動一世而晚迺被
禍如此豈應變將畧或非其所習耶抑其命數使然
也歿數日迺有䟽其計為不謬者又數日惠安伯竟
得寬貸削祿米闕住而公不可作矣人以是益悲之
少卿余門生師言亦來受學然余為公銘則非特以
是故也銘曰

嗚呼東田仕路初騫譽望頓宣如鳳斯翥如景星
斯懸是亦東田獨抗奸權斥歸林泉如玉在山若
明珠在川是亦東田莫景餘年時移運遷其揚也

或升之天其抑也或墜之淵是亦東田我思昔賢
有謀亦然彼胡以全公胡以顛嗚呼東田

都察院右副都御史九川呂公墓表

韓邦奇

九川公飲恨而卒其友朝邑韓苑洛發其隱撫其大
及取名士潘子高之論痛哭流涕長太息表其墓曰
書曰善降祥又曰天難諶公關中即俊即宅之賢也
懷安攘之志抱忠亮之節蘊貞懿之學秉廉介之操
中遭震撼放遺終身道遠而位促光已輝而弗續志
士至今傷之公之撫遼陽也清屯田裁冗役嚴號令
禁奸宄按豪雄料丁力將築邊墉以遏虜寇一二渠
兇魁罪懼將必當大法惑衆倡亂而公危矣初公以
左布政起復入京故事必先補原職而徐後遷之先

相以公國士也不可以常調拘陞副都御史巡撫遼東及變上近貴先相故大恣誤以公爲先相與因欲罪之憲使者又不爲公申有詔收繫公詔獄使者至遼陽諸兇并使者笞辱之林侍郎廷昂奉勅勸公事諸兇閉之憲使者出帑金大賚乃啓門且撫慰諸兇謂公必重生蓋圖悅諸兇心隱其械詔使寤侍郎弗以聞而公果重生遠戍憲使者以平定論功超遷矣公平生建立如何而枉罹橫尤若此祥邪非邪天邪果難謀邪然公議無泯時士林扼腕嘆息位雖禡而名弗損身雖屈而道則亨後公之嗣子光于科甲

顯于庠序繩繩未艾擠公者今安在也天難謀邪非邪公今已矣倚於史冊罪也功也是邪非邪嗚呼可以徵矣吾友潘子高曰正德間閹宦武夫相繼盜弄國柄生殺予奪頤指氣使當其時勢摧威劫中外風靡士大夫依阿忍澆以保身全妻子鮮有能自立者公于時明目張膽數侃侃論天下事不置儲保治諸疏讀之凜凜使人毛髮竦立疾風勁草狂瀾砥柱公之謂與大同數逆而失處諸鎮効尤焉爲政者往往務爲姑息不敢下一令伸一法遂使狂狡之卒裒兇鞠頑待釁而動養患貽戚至于今未已也公以身任

其事務改絃而更張之天若厭禍公得大行其道豈
惟遼左永清即大同諸鎮亦當警懼知有朝廷矣
乃志未就而變即作獨使公一人當之豈非天哉語
有曰非常之元黎民懼焉及臻厥成天下宴如也人
徒見公受禍之慘而未覩宴如之効乃併大同諸鎮
事置不講藩鎮之鑒其不遠也已有志于天下者其
無忽諸此乃公之隱而且大者也吾恐後世莫察其
情焉故表而出之公之子南京刑部郎中顯再拜泣
血登之石若公之詳載之誌銘不具書公諱經字道
夫號九川姓呂氏陝西慶陽府寧州人也起家進士
授禮科給事中歷吏科都給事中調山西蒲州同知
詔起陞山東布政司左叅政歷按察使左右布政陞
都察院右副都御史公生于成化丙申十二月初八
日卒于嘉靖甲辰十一月十五日享年六十九歲云

琬琰廣錄

巡撫雲南

楊寧

直隸歙縣人

侯璉

山西澤州人 碑銘 五

鄭顯

浙江錢塘人

王恕

陝西三原人

吳誠

浙江錢塘人 誌銘 張汝弼

程宗

直隸常熟人

章律

直隸常熟人

楊繼宗

山西陽城人 傳 袁萊

王詔 直隸趙州人

張誥 直隸華亭人
碑銘 顧清

李士實 江西豐城人

陳金 湖廣應城人

洪鍾 浙江錢塘人

林元甫 福建莆田人

吳文度 應天江寧人

顧源 直隸長洲人

洪遠 直隸歙縣人

王懋中 江西安福人

范鏞 陝西鞏昌人
誌銘 康海

何孟春 湖廣郴州人

王啓 浙江黃巖人

黃衷 廣東南海人

劉文莊 陝西華陰人

吳祺 江西豐城人

傅習 江西進賢人

歐陽重 江西廬陵人
誌銘 羅漢先

顧應祥 浙江長興人

胡訓 江西南昌人

汪文盛 湖廣崇陽人

劉渠 湖廣鍾祥人

陳則清 福建閩縣人

應大猷 浙江仙居人

吳章 廣東南海人

韓楷 湖廣江夏人

胡奎 江西峽江人

石簡 浙江寧海人

鮑象賢 直隸歙縣人

孫世祐 江西豐城人

周采 湖廣寧鄉人
誌銘 徐階

郝惟嶽 四川叙南人

陳鯁 湖廣江陵人

王昂 廣東章丘人

游居敬 福建南平人

蔣宗魯 貴州普安人

曹汴 湖廣江陵人

兵部尚書侯公神道碑

王直

侯氏世家澤州公之曾大父伯謙大父慶先父大亨
皆業儒而不仕公諱進字廷玉自幼端重寡言笑而
聰敏喜學慷慨有大志讀書窮日夜不休凡遇宴樂
輒先退不欲以酒廢事先生長者皆以遠大期之舉
為州學弟子員永樂癸卯山西鄉試第一遂取進士
為行人以善辭令而剛果能斷得名四川雲南廣西
諸土官爭地累年不決者朝廷以命公至則按圖
誌考故實召諸耆老開誠布公智力背股不可移由
是皆悅服而罷上亦以為能交趾黎麟請命公輔

禮部侍郎章啟往錫封至其境關門低且隘先驅者謂當偃度公止之曰此中國所謂狗竇也於土人出入則宜今天命下臨不可由此度迂者驚懼為撤閔乃度由是蠻夷益謹禮不敢肆既歸毫髮無所受人以此益賢之遷兵部主事虜寇河台朶兒只伯犯邊會昌伯趙安尚書柴車等自涼州分兵出鐵門關攻敗之公與有勞績以外憂歸居喪盡禮而哀戚加焉服除陞郎中麓川思仁發反詔尚書王驥率師討之公在行往來督戰視將校用命以施賞罰賊攻大候州公以偏師往援令于衆曰吾視賊氣驕有輕我心宜掩其不備即麾衆薄之呼聲動天地斬殺無算

賊大潰我師益奮與叅將冉保等遂破石甸等十餘寨聞大軍至麓川賊阻截不得通公與保等由高黎貢山晝夜兼程進與大軍合擣其巢穴賊遂平凱旋陞禮部右侍郎賜白金五十兩鈔五千錠綵幣五表裏且錫誥命以寵之贈大父父皆禮部右侍郎祖妣李氏母來氏皆贈淑人封繼母劉為太淑人妻翟封淑人尋奉勅鎮雲南得便宜從事雲南飢公發倉廩及募富民出粟以賑之全活甚衆會再討麓川餘黨公引偏師由干崖南甸進破賊子思機發所居寨獲

其妻孥輜畜捷聞陞左侍郎。賜白金七十兩，鈔五千錠，綵幣七表裏。丁太洲人憂，命馳傳奔喪，即起復。遣行人賜祭，官為治塋。遷兵部侍郎，復鎮雲南。築騰衝城，置軍衛焉。時議以賊子思機發在孟養，復命靖遠伯王驥以兵往勦之。公與都督張軌分軍抵金沙江，造船先濟，奪賊地為營。於是大軍畢度，燬其柵而進。賊奔孟養，度不能支，各鳥獸散去。公窮追至孟糯海子等處，不可得。乃班師。諸夷酋長皆震駭曰：自古漢人無度金沙江者，今大軍至此，真天威也。南夷無復反矣。還鎮雲南。今上即位，遣使齎勅嘉勞，賜白金

二十兩，綵幣二表裏。貴州飢，苗叛攻圍新添諸衛。道梗弗通，城中食盡。命公總督軍務往征之。時晉定圍急，公自雲南選善射者為前鋒，自將至晉定。疾戰矢下如雨，賊大敗。圍解，遂趨貴州。副總兵都督田禮等以兵來會。克龍里、甕城、羊腸、楊老。今溪諸路新添平。越清平都勻諸圍俱解。由興隆而下，抵鎮遠。皆平定事聞。上嘉其功，陞兵部尚書。又進克安莊、克西堡。長官司時署兩方，盛瘡瘍大作。公得疾，昇婦。普定醫弗效。諸將問疾，惟戒以勿輕。賊宜整兵進勦，無貽患生民。遂卒。未嘗一語及私。時景泰庚午八月十三

日也 上聞嗟悼遣官賜祭命歸其柩於澤州有司
治墳以塋生於洪武戊寅三月初六日享年五十三
其塋以是年十二月十二日其墓在五門山前先塋
之次子男一曰壽 朝廷以公功命為錦衣衛世襲
正千戶女一許嫁寧山衛指揮胡剛之子長景未行
孫男三侃偉儀公姿貌瓌傑器量弘深而兼資文武
仁義忠信之實有諸內功名事業之美見諸外卓然
為今名臣人之能者蓋鮮矣予念天之生賢必使之
有為於世俾荷 國家之重而得盡其才不徒小試
而已也 今天子勵精圖治日靖四方而公以壯盛

之年當載定之託遠大悠久之業不克見其成嗚呼
豈非可惜哉予與公同朝久相好為最深於是爵來
請予文刻諸神道以示久遠誼不可辭也乃序次其
事之大者而系以銘銘曰

侯氏之先世為儒家自君祖考弗耀其華君早嗜
學科乃峻擢歷位而陞膺此殊渥文武之才兩取
其擾伐叛南夷克闡令猷偏師疾攻風激霆怒振
槁摧枯有仆無拒飛度金沙遺孽遁逃烟塵廓清
弓矢載索蠡茲有苗乃敢干紀震以餘威所向披
靡遂涉夏卿遽返于冥維茲戎功弗究厥成 天

子曰嘻曷表朕志五品之榮子孫世繼大山峩峩
靈秀所鍾蔚然新宮公在其中勤銘多碑負以龜
趾詒後不忘庶其在此

都察院右副都御史吳公墓誌銘

張汝弼

嗚呼天生偉才所以擬時變歟時不能無變惟得才
以濟之雖變不極民生有賴矣天人相與自古有然
者今于吳都憲公見之子昔自兵部出守南安時聞
湖湘有草竊之警言雲南有交趾之擾當道或張目失
措廷議以左布政使吳誠陞右副都御史往撫既而
就擒歸化而成父母之嗚呼若吳公者非天之所擬
以濟斯變乎公年六十有一以成化年月某日卒於
雲南黔國公沐公遣官送護歸擿于鄉 天子悼卹
賜祭塋如禮擇以甲辰十二月日塋於龍井山之風

篁嶺其子瑤理襄事其兄子卿貢進士璿奉其鄉人
廣西叅政朱廷用狀來松江拜予乞誌于墓按狀吳
世為錢塘著姓曾祖子昌妣賈祖原敬妣孫考士寧
妣徐配王繼凌側室李氏祖考及妣與配皆累贈至
右副都御史淑人長子瑞以軍功為冠帶舍人次即
瑤次琪女三福建僉事談俊士人夏英其婿也一未
行孫女三俱幼公字尚忠號思庵天資穎異操行孝
謹識尤超卓景泰庚午以禮經領浙江鄉薦辛未登
進士第除兵部武庫主事丁外艱起復除吏部考功
主事尋改工部虞衡授文敕推封進階承德郎陞郎

中授文誥推封進階奉政大夫是歲禮部會試充同
考試官又授命文敕封慶府充副使尋陞四川右叅
政與巡按御史同理刑獄多所平反丁亥文上命襄
城伯李瑾率兵平番夷公督餉有方賜文綺丁內艱
起復陞貴州左叅政尋陞湖廣右布政上命總兵官
李震討靖州苗蠻公又督餉受賜戍戍陞左布政使
威惠竝流聲動遐邇由是奉文敕拜右副御史巡撫
湖廣兼理軍務整飭兵備事無畏難所指輒效寇攘
屏跡時交趾弄兵滋久寇抵雲南又文敕巡撫雲南
公至戒飭各邊土官八百宣慰諸司嚴兵以待適賊

擁入淄山口營我軍乘震雷奮擊賊衆驚潰擠蹙橫
尸蔽江雲南輯寧降敕褒諭雲南素少雪比歲見白
物無疢癘以為公政所格蓋公疏剔勞徠弛張抑揚
鞠躬盡瘁宜其所至天人叶應不負所職也銘之不
特為封營攸久計抑可備太史氏采擇以為後法焉
銘曰
豫樟棟廟湛盧剗犀其器也良其用也宜天子明聖
斯亦見之驅厲以雪助師以雷人謀所至天亦弗違
天且弗違人其敢欺爰琢樂石刻我詩保此樂丘
億千萬期

都察院右僉都御史陽城楊公傳

袁袞

楊繼宗字承芳山西陽城人也天順丁丑進士授刑
部貴州司主事獄中重辟囚多瘐死繼宗每提牢必
給食飲三日一擲沐全活者頗衆擢知嘉興府以倉
頭一人自隨若旅寓然御史楊琅奏最下詔旌之九
載滿去民遮道泣番為立去思碑陞浙江按察使憲
度振肅初藩臬諸司所用皆取辦於下鎮守中官日
給萬錢悉革去之丁內艱去將行悉以解中物付有
司篋中惟律數卷衣數襲而已制終詔起陞左僉都
御史巡撫順天外戚中貴多占民間土田悉奪還之

權貴歛跡成化乙巳上疏左遷雲南按察副使弘治元年陞湖廣按察使復陞左僉都御史巡撫雲南卒于官表褒曰揚公以清嚴彊遂著赫赫之聲藹李人雖婦人孺子皆知其名至今稱之不衰所至如攜李可不謂賢乎

都察院右副都御史古菴張公神道碑 顧清

張在宋為汴人南渡時始遷于杭再徙華亭之張故

為著姓公之族以儒素班焉然至公始大家鶴城書

院西時呼為鶴城張公高祖元亨曾祖天佑祖仲清

並有令名晦迹田里遜字時敏讀書善吟與陸夢菴

潤玉王雪航公珮等為詩社十友著在郡牒妣余氏

有賢行實生公諱誥字汝欽幼而簡重不與群兒伍

以長銳志于學為文章操筆輒成見者歎異以府學

生領天順己卯鄉薦登成化丙戌進士改翰林庶吉

士受業劉文安公定之為公所器許戊子拜監察御

史巡視長蘆鹽場平時豪猾倚權勢作姦罔利者悉
裁以法諸場為清甲午按湖廣吏有望風自引退者
監鄉試選舉行人所錄文至今以為式諸生坐歲考
弗稱有停廩踰年者公謂不稱當黜不當停其廩移
文所司以為非朝廷制所司懼即為改正其移文諸
司亦版行之丁酉陞廣東按察副使巡督海道鄉人
有附番商越境牟利者公嚴為之禁其弊遂絕丁內
外艱服闋改四川陞按察使弘治初蜀土連饑公請
于朝停荆襄岳武等衛運得米二十餘萬石又發廣
濟庫銀易米數十萬石隨所在貯之委廉能吏計口

支給又倣韓魏公及朱子法十步一窺為糜粥以食
老穉之不能自食者所全活不勝計蜀人德之陞貴
州左布政使閩帑歲得羨銀數萬兩有利動公者公
正色曰此民之脂膏可以自私邪命吏著之籍為賑
濟備言者愧服陞都察院右副都御史巡撫雲南雲
南去闕庭遠積有疑獄至十餘年不決公原其情為
剖析言于悉見宥免竹子諸山箐夷羅構亂劫掠為
居民害或請以兵五路進剿者公止之曰彼為盜豈
本心迫饑寒耳村寨固有良民今加兵且玉石俱碎
非有撫綏意乃自為文選吏為夷民信服者分持往

諭之降者相屬前後以千數餘黨各散去竟不煩兵而罷木邦孟密相讐殺諭之弗聽聽輒復反公曰此非可以口舌勝也檄諸道各練兵積粟山為必討計二虜始惧而自戢朝廷嘉公功有綵幣銀牌之賜蓋公之臨事伸縮卷舒文武並用有如此者以年及思休累上乞骸之疏戊午冬得請未歸監軍總兵而下盛供帳餞于數十里外且出白金為贐公皆不受咸歎息而返間居十三年治丘壠葺廬舍教子姪讀書為身後計戚之貧者衣食之故舊之失所者拯濟之鄉鄰有疾病死喪而不給者周卹之蓋其不盡施而

及於業梓者又如此公生宣德癸丑正月二十有三日卒以正德辛未九月十三日享年七十有九配謝氏祈州判官嗣宗之女先公三年卒側室周氏朱氏韓氏子男四文英文魁文明俱夭其季曰文貴女四人義官林璋縣丞沈高鄉貢進士李元祥太學生陸瀛其壻也文貴以公卒之明年某月某日塋公於余山新塋刑部郎中周君鳴玉既誌諸幽矣官九列於令得立碑文青泣拜以文請惟公以儒家子奮身取高第績學詞林出掌邦憲累官至二品積階至正奉大夫勲至正治卿贈封其父祖至通議大夫右副都

御史祖母母妻皆泚人蔭其子文貴以髫年入太學
風采在朝廷威惠在藩服名德在鄉里而又享有高
壽正寢考終可謂裕後光前終始無憾者矣系之銘
曰侃侃張公望于鶴城甲科文苑名配列星為中執
法臺閣風生出殿方夏遠戢邇寧帝曰汝來公倦于
行南粵東齊梁益荆湖有雷有風公馬載驅龍潭鳳
山松陵具區雲消浪平公歸在吳公有長才耳正有
服公之忠誠垂老彌篤安車弗至白雲遽來嗣子擗
踊邦國興哀歲于北山其末終吉松楸鬱然公手所
植刻詩墓道過者必式

都察院右副都御史謚恭惠范公墓誌銘

康海

公諱鏞字鳴遠上世松江華亭人也曾祖諱不采永
樂時謫戍鞏昌衛故世為鞏昌人不采生文真文真
生浦浦娶沈氏生公年十四補府學生治禮經有名
場屋成化丙午中鄉試禮魁明年中乙榜署教諭于
新鄉克勤教事布政使潘鐸給事中李光翰所造士
也嘗聘為四川順天考官弘治癸丑登毛澄榜進士
冬十二月授湖廣道試御史巡歷五城豪右憚烏甲
寅實授同王給事中廷李即中贊清理宣大馬政牧

地有所侵者悉歸于民乃上十三事請歲以實在馬
四萬為額額足以應科馬折銀在官不足始合添補
畿內至今稱便而太僕亦多儲積也丁卯刷卷雲南
七月而歸父母與妻皆受封己未陞浙江按察司僉
事海寧早上命王都御史璟來賑官屬承委者百姓
多訟不均乃委公公不數日劑量伸縮悉有條理百
姓喜曰早得公來賑我奚患也王公驚嘆曰真按察
奇才遂薦之于上甲子冬陞四川按察司副使奉勅
整飭建昌兵備時分守內官蘇某戒其下曰范公正
直剛方爾輩其慎之乙丑冬丁外艱喪事一遵朱子

家禮戊辰服除值劉瑾用事查盤天下倉糧公與補
陪之數或勸之謂瑾不聽遂淹居于家者三載庚午
秋瑾伏誅始復除四川按察副使仍兵備建昌益瑾
用事時天下兵備多所裁革至是吏部乃復用公軍
民喜曰還我范青天我輩復生矣建昌所屬會川有
金銀銅錫礦分守內官以國課為名戍卒採挖之結
不可勝言流移死者相望于道公力為奏罷之軍民
咸悅辛未秋八月蜀盜起總制林都御史俊巡撫高
都御史崇熙檄下徵建昌土漢民兵策應屬公統之
六月閩月廖麻子餘黨若么兒光子等咸授首焉巡按

俞御史縉與總制巡撫具功以聞冬十二月陞浙江
布政司左叅政壬申夏四月陞浙江按察使九月紹
寧以海潮傷民田廬民不堪命將生不軌陶都御史
琰以先往撫者束手無策顧公曰君職長憲司雖不
可煩以他事然朝廷軫念黎元之意微君其誰與勝
君其往焉公請得銀二萬兩以往不踰月民安堵如
故癸酉夏江西盜起上命陶都御史治兵于衢薦公
自代因命公叅贊其事七月以內艱歸服除南京都
察院右僉都御史提督操江清占役嚴節制又劾去
懷寧侯孫應爵老不任事豪右俯首救過江表肅清
未幾陞都察院右副都御史巡撫雲南地方雲南遠
在萬里夷漢雜處人情土俗大戾中土公懲姦採弊
無所不盡復會御史羅王王都御史啟奏計處天下
驛傳以一政令謂公施為政事率多遺愛至今人猶
思之于驛傳一事尤見用心不苟豈可率然更改公
之撫滇則何異於王端毅也公行法之際唯理是據
一無所顧朱寧用事時其親犯法即以所犯罪置法寧
含之會公委官小事媒藥為罪械繫禁獄備極困辱
且令人誘曰可賂請于寧否且重譴矣公曰予無中
人之產賂將焉具我無罪於朝廷渠必殺我駢首赴

刃而已議死議成皆不得乃降為湖廣布政司右叅
議正德庚辰正月二十七日丙辰以疾卒于官由生
天順己卯十月五日癸丑春秋六十又二辛巳夏四
月今上臨御吏部請郵遺直舉賢才以禪化理公竟
獲伸遂復原職八月巡按御史曹珪復請表揚忠正
大臣以勸外官首論公器識高明而廉靜簡重學行
貞純而忠清公亮少與彭澤齊名人常以公輔之器
待之是亦當時完名全節之士若不可以秦漢以下
人物論之也欵隆以差祭崇以贈謚錄其子孫為人
臣勸制可遣苑馬寺卿郭韶贈祭一壇禮工二部給

賻奠甚優追贈通議大夫都察院右副都御史謚恭
惠祖文貞父浦並贈如公祖妣朱氏妣沈氏妻夏與
梁皆贈封為洲人廕其次子愈入監讀書刑部尚書
唐龍巡按江西特請公清苦不改寒士之風忠勤方
負純臣之望請祀公雲南制可令于雲南名宦祀立
木主配享尚書富平張統三原王恕於乎公之存沒
哀榮稱譽可謂無忝所學爾矣初配夏氏郡人夏忠
之女生男子三人天民應奎應期女子四人皆早沒
繼配戴氏末年教諭大梁戴儉之女生男子一人息
中戊子禮魁世公之業娶叅政岷人王鐸之靈子一

人適都指揮汪麟嫡子指揮使川再繼梁氏靈氏石
合成寧梁璿之女生男子一人愈都察院檢校初娶
提舉定西魏璋之女繼娶刑部右侍郎張鸞之女女
子一人尚未許人息生女二人愈生子女二人茲公
之孫也嘉靖癸未息等將以閏四月二十二日壬戌
莖公南河之原祖塋以合于夏洲人戴孺人之兆謂
公卒時必歆海為銘其墓石疾疾所嬰廟至于今始
得撰述行事以詔後賢夫世之君子砥礪名節者嘗
後先相望矣然飭于其明而倦于其闇不可枚舉抑
豈有如公者公稽古嗜學篤義樂善海與鄆杜王九

思嘗私論之以為難能期之官行政唐尚書數歎其
處有定見行有定守平易近民慷慨臨事患難所及
屹如太山畧無私顧其人品豈近世所恒見哉蓋棺
之後公論亶益足以徵公矣自號謙齋易曰謙尊
而光公之謂也又曰謙受益茲公非益耶銘曰隴山
巖西土所瞻孕靈毓粹公生豈凡範世表物懦之
廉建昌紹寧反秦為甘百姓誦德天子是舍既清江
表旋撫滇南深思熟慮惟民是威信法獲戾奚用弗
湛大星墜楚卒公于說聖作物觀公論若曇表貞述
德溢息是覃策勲昭謚邈命唯三繼魁履孝倬哉長

男中承廕嗣公之謙南河之原厥壤實涵公阡于此
血食于黔紹休迪德我銘可探

都察院右僉都御史三厓歐陽公墓志銘甲寅

羅洪先

公名重字子重別號三厓吉安廬陵人也吉安著姓
歐陽氏最繁公出安福令萬衍後世居釣源二十世
祖觀善徙水陂高祖憲文明初仕為翰林檢閱曾
祖用堅祖元器考權以公貴封奉直大夫刑部郎中
母曲山蕭氏封宜人子三人公其仲也年二十二舉
弘治甲子鄉試高等戊辰禮部中式廷試對策力詆
時政缺失讀卷官畏禍不敢上抑寘進士出身第五
人為許大宰進所知初授刑部浙江司主事進承德

卽歷員外卽改山西司卽中進奉直大夫擢四川按察司副使奉敕提督學校以母憂去服除補雲南督學轉浙江按察使未上擢都察院右僉都御史奉敕總理蘇松糧儲兼巡撫應天等處會尋甸賊安銓反以公熟于滇事遂改巡撫雲南二年致仕公為人眉目皎皙溫美望之如羽人處子比居官刻厲謹約數以職守忤權倖有武夫俠客顧望而寒心者嘗曰先民有言君子全身遠害惟有不仕而已既為官又避禍有是理乎此其所以終身者也故自入仕以來未嘗一日不治事亦未嘗一事不守法法有所在卽朝議曲為解宥不敢聽法有不可雖俗情習為隱忍不能其始為刑部逆瑾柄國擅生殺百官除拜必詣私宅蒲伏叩頭如廷謝禮瑾兄死百官往哭必四拜以序班籍名驗至否公獨違衆不一往瑾不加害瑾敗而餘黨錢寧張銳誣逮播紳前後相踵公於田崑扈仁李穩余祐樊準之獄皆出死力相爭卽嚴旨切責不為動銳不勝忿以他事中公下廷尉久之索癥不得竟還職於是獄之根株難治者衆多遜公嘗決囚南直隸勘事河南錄浙江囚每臨訊不更閱辭人出數言輕重其罪各中情隱其郡縣如監司或欲有

所出入公即歷歷摘招伏語相詰如經生背誦書不
錯一字難者眊聘噤口人皆稱神其後兩為督學即
又善說書史指畫經義士人宗之安銓之變斬關殺
吏攻圍鎮城而阿迷嶒峨新興蒙自武定騰衝諸賊
相煽且起是時老撾潛通交趾木邦益養與緬甸益
密互相讎殺師宗納樓思陀八寨廣南亦佐威遠皆
亂勢亟矣公聞命自金陵晝夜行三十五日入滇不
四月銓等授首上以銀幣勞公公謂前都御史傳
習以死勤事而身享其成不可上疏固辭且以滇夷
獸面鳥言不易馴伏有司恃險遠恣為嘍割則寧殄

跳躑相報苟拊徇不至兵革未有休息時也於是籍
諸郡縣殘破者給食散種差其免租之限如含薄糜
哺弱子而於諸夷或判疆域解怨爭攜黨與而歸種落
則如投善劑以消毒瘍減月例家火以寬農覈武官
職田以代俸止蒼石玩器之害定土官替習之規又
如積餘饒以充虛橐至若鹽鐵銅錢商稅之辦納徭
役里甲之踈數稅糧輸積之遠近軍屯民田之隱漏
又皆酌地力時變而精研之則治家者之於米鹽零
碎蓋藏之不遺筭也上既知公可任數下璽書褒
公公益感奮而總兵沐紹勛以上公世守茲土與鎮

守巨璫杜唐表裏為奸培刻境內歲且至數十萬公已切而近歲上供金寶浮羨過正直且二倍皆出唐所指揮會當進奉公請得禁治諸弊詔從之而唐庇私人不受理公遂疏唐不法數十事復以他事疏紹勛兩人併力行賄撼公使去公疏此兩人至十餘上兩人益懼嗾軍士以索糧不得叫囂醜公公既伐其隱謀乃更自以三疏乞休而輔臣方角黨求勝至是為賄者所乘卒右兩人坐公不能調停與致仕且連巡按御史謫調給事中論掾者奪俸一月公請自坐除名贖御史追奪已俸贖給事中不聽公慮所言不效來者藉口實將事體更壞於是復上兩人交構狀以為佞人不可不遠累數千言明已非輔臣黨人願弛前此黨禁復諸逐臣蓋公已離滇久矣不以去位為嫌而以後政為慮不以去官為辱而以完名為榮聞者莫不危公恐觸上怒而公之懇款若未效百一於君父前者為郎中時乾清宮灾應詔陳言五事中如早朝帳房番僧宮市皆人所難言至指老兒黨者即寧銳諸人且嘗其反噬者也顧斷斷不肯釋口豈所謂胥靡忘險故耶正德間權倖用事公數數相忤不及禍今上初踰為治朝公又屢受

知遇宜得展布矣乃卒為權倖所中致仕時年終四十七家居視入仕之日為多使得就日力以盡展布其可稱述何限將有靳之然者豈非命乎其後邊方多故許大宰讚數薦其才不報大宰讚者前大宰子也公自致仕輒引避絕無外交部使者至郡或不知有公即聞公名以不得見竟不知公為何如久之亦無有薦公者公性孝友嘗兩䟽扶持奉直公省母宜人在官聞母計即日就道既莖廬居墓下久不去官中無一長物出餘俸治室廬與兄弟共居無分異收族教子周貧卹寡稱其力不懈也公既廩而多施所居去城市二舍許未嘗一見郡縣官即在鄉未嘗以辭色忤人鄉與鄰者若不知有公即相見不信能忤權倖為人難為一至是也公生成化癸卯卒嘉靖癸丑年七十有一娶劉氏封安人進宜人先公幾月卒子二長庠次薦皆府學諸生孫男本孫女一諸孤以是年某月日祔公傳家坑宋水部員外祖墳右以宗人南京大理寺正瑜所為狀來請銘且曰公治命也其嘗聞公于外父太僕魯公則已想慕其為人乃今讀狀與諸奏稿既悔生同郡未獲識面以快所欲見又悔近其居不及侍語以請所欲聞然幸銘墓傳其

平生以酬所欲得猶可以自解也銘曰
侃侃遺直秉文開誠有服克恭邦憲孔明四星斯
皇寔蹶天步果正我行履險若素式時陳臬弼教
用成 帝曰休茲作朕股肱于畿于滇無間遐邇
臣拜稽首矢志弗弛遏蠻戒戎反側以馴懷哉萬
里如疾去身惜是宵人敗度干紀我其治之歸報
天子封囊扣闔天聽匪高禍魯不悔以其黨驕
孰云罔懲奸氣潛奪位胡不終竊位者但臣敢辱
祖廬陵歐陽故史誄銘副于大常

巡撫雲南右副都御史瀉陽周公墓誌銘

徐階

曩予在經局日從東郭鄒子荆川唐子念菴羅子相
與切磋於身心之學于時士大夫之賢者大率辱與
予四人遊若瀉陽周公其一也公為人養深而守定
視其貌蕭然懦且怯及與之言閭閻侃侃乃漸發露
至於臨事雖死生在前終不可屈奪蓋孔子所稱仁
者之勇也當是時朋類莫不推公賢以為公他日在
廟堂必能為國家定大議鎮雅俗使海內獲覩正人
君子之作用庶幾以明講學者不盡為空言公亦勇
自任毅然不撓人乃日覺其異自禮科都給事中出

爲陝西右叅政遷福建按察使四川右布政使轉左使徊翔藩臬者十有二年始遷都察院右副都御史巡撫雲南公於內拜最遲得地又最遠士或爲公不平或爲公喜以爲忌公者終不能以其私廢輿論之公終當有以慰昔之所屬望者而公蒞鎮旬日遽遭外艱歸其廬四月以過毀得疾遽卒嗟乎其命也耶其抑有忌之於冥冥之中者耶公生正德丁卯十二月六日卒嘉靖丙辰五月二十六日得壽僅五十無子以兄之子耀承後年十有二予往年讀太史公所作伯夷傳心竊病其怨誹之甚於中道未爲合及今觀於世享富貴久長者其人率如彼而公於位於壽於子孫獨如此然則太史公之怨誹亦其情宜然也公卒後數月耀承具疏請卹典格於例得賜祭一壇及葬費之半於是耀承以公遺言請予銘墓予固悲公者不得辭公長沙寧鄉人諱采字子亮馮陽其號舉嘉靖壬辰進士授中書舍人選吏科給事中再遷至吏科左給事中充會試同考試官遷禮科都給事中補外歷官所至交薦胡御史彥嘗疏于朝曰居然大雅卓爾不群論者以爲知人曾祖添裕祖鎮以公貴贈通奉大夫四川左布政使父策領湖廣鄉薦

知貴縣有聲封文林郎中書舍人再封左布政使母
唐氏贈夫人配某氏繼劉氏贈封皆夫人女一劉夫
人出耀承幼不能悉知其父事故予於其政亦不得
詳姑以曩昔之知公者誌而銘之其詞曰
吁嗟瀉陽埋骨于茲誰實生之又誰尼之吾悲者
時

琬琰廣錄
巡撫貴州

丁璿 應天上元人

侯璿 山西澤州人

王詢 湖廣公安人

王來 浙江慈谿人

蔣琳 浙江錢塘人

白圭 直隸南宮人

王儉 四川銅梁人

王浩 湖廣石首人

陳宜 江西泰和人

程信 直隸林寧人

秦敬 順天涿州人

宋欽 陝西乾州人

陳儼 江西廬陵人

謝昶 湖廣黃岡人

孔鏞 直隸長洲人

鄧廷瓚 湖廣巴陵人

張文昭 山東平山人

高崧 河南葉城人

王軾 湖廣公安人

張庶 浙江歸安人

錢鈺 浙江杭州人

汪奎 直隸婺源人

劉洪 湖廣鍾祥人

林元甫 福建莆田人 碑銘林俊

洪鍾 浙江錢塘人

王質 山東濟寧人

邵寶 直隸無錫人

楊茂元 浙江勤縣人

沈林 直隸長洲人

陳天祥 直隸吳縣人

蕭种 四川內江人

曹祥 直隸歙縣人 狀 巨冊

鄒文盛 湖廣公安人

魏英 浙江慈谿人 誌銘 張邦奇

湯沐 直隸江陰人

楊一漢 廣東南海人

袁宗儒 直隸雄縣人

葉相 直隸江都人

劉士元 四川彭縣人

徐閣 直隸武進人

戴書 湖廣崇陽人

陳克宅 浙江餘姚人

汪珊 直隸貴池人

張鉞 江西安平人

韓士英 四川南充人

劉彭年 四川巴縣人

劉渠 湖廣鍾祥人

王學益 江西安福人

李義壯 廣東南海人

任 輟 四川巴縣人

劉大直 四川華陽人

張鶚翼 直隸上饒 傳 朱察鄉

高 翀 湖廣安陸人

鮑道明 直隸欽縣人

趙 鈺 直隸桐城人

吳維嶽 浙江孝豐人 狀 汪道崑

康 朗 福建惠安人

陳洪濛 浙江仁和人 碑銘 王世貞 誌銘 余有丁

杜 拯 江西豐城人

嚴 清 雲南後衛人

趙 錦 浙江餘姚人

王 諍 浙江永嘉人 表 王世貞

阮文中 江西南昌人

蔡 文 福建南靖人

都察院右副都御史林公豫齋神道碑

林俊

吾家都憲豫齋公之巡撫雲南也以末疾請老者三

上難之與驛權就醫于家在牀褥者三年正德戊

辰年六十四以終時逆瑾擅柄大臣卒無敢以聞瑾

誅始聞賜祭賜葬季子有孚輒監察御史來相葬

事葬之紫帽山配陳合焉公成化乙未進士選工科

給事中充占城冊封正使以言罷遣同列蕭顯等言

事臣姓名屏間一日付吏部與外公以母憂先去獨

免既之代正使者死海上副使論死責成識者有以

知造物之曲為公地服闋吏部亦為之所注南京禮

科給事中父憂又去服闋弘治時也復禮科給事中
陞禮科都給事中論列時出畫可定國本攬朝綱謹
好尚節公費黜不職言甚切當而阻注直王越之謀進
士魯蓄之貢甚力擢山東布政司左叅政畢情民隱
而舉其荒政時議稅額石增五升備荒公曰此筭歛
遺意利緩而病切在民竟無歛 王妃葬大治瑩域
公制自執比付他官民素困遂為之瑩有于是怨有
歸而公之風愈重撫巡交薦之擢雲南右布政使轉
左陝西火篩孔棘區畫兵饟忘為勞而調發飛輓民
不為妻撫巡又交薦之擢都察院右副都御史巡撫
四川屬川寇發一麾平之有金幣之賜番夷殺守
路官公獲兼倍而其首僅遺言者劾總兵輕事而謂
公緩賊與貴州易撫代者至欲炫已功授意兵偵市
夷見斷首抵賊為言者所彈始明公之不欺 孝宗
悟移撫雲南將收而入之而以疾告諱普長以字元
甫行更字秉仁林出九牧而同子邵州公系昭度之
世秀眉豐頰美髭鬚軀幹脩偉山立而玉潤在班行
無過者立心務厚而居以渾晦謀預事先聲與惠流
所薦引所自僚友之誣無知者在平原建董仲舒書
院在蜀祀趙清獻公與文翁李冰張忠定並祠尹恭

簡王端毅稱遠器韓司徒文力汲引時吾聞諸老皆
在南而年頗近迫予任直取忤位遇諍極私以屬公
鄭司徒紀曰容色大麗嗚呼謂非相非與公晚益完
粹予起征蜀公遺德在人雲貴之聲往往能道者居
家儀則來進所歆發弟哲甫教諭子有恒都察院都
事有章尚義階有孚與從子有年並為御史有年疏
止取佛謫丞有祿郡同知孫大呂大選郡庠生與大
道大嚴大旦蘭立筭出孝義載振鄉賢列祀父良弼
初封工科給事中妣黃配陳封孺人再贈父並祖宏
恭皆通議大夫都察院右副都御史祖妣李與妣與
配皆淑人繼配孔封淑人記京師公與黃公文器材
公長深黃公汝孝及予道義相許與最後獨予人年
壽相匹公又歿耶銘曰

十德九刺邵州奕奕開先忠儒孝弟永錫有煌厥
似而美斯觀如嶽之重如玉之寒昔在諫垣謬謬
暨暨于宣于旬于是倚毗乃都中臺乃殿西服士
有詩書 農有絲穀三藩嘉靖 帝念勞臣程脩
步跼委運還真臘仙原爰有卹章為龍為光日星
發祥

三倍之勤能皆至無詭於行故其考績不曰持身無
過幹理惟勤則曰操履廉謹出納公平不曰謹操守
勤職業則曰持身約而不放綜治密而不苟云弘治
十年丁外艱服闋陞南京工部都水司郎中黜淫巧
遵槩度費用無經者必置之法侵尅累繫者悉為之
處一時工稱其平而民不告擾十五年陞寶慶知府
時稱郡小民貧寡學故府久乏科目公至銳意作興
不時臨學講解辯詰嚴課程以稽勤惰厚廩餼以恤
貧窶士氣克振科第接有聞本郡民多務水田山地
荒蕪縱放畜牧因生盜竊乃嚴為禁止教民於少峻
山塲藝植有利群木開平沃處種五穀而有游惰編
之力差一二年間即獲利益盜亦寢息其於溪澗高
埠之田廼教民置車作埧輪汲以灌雖旱乾亦有全
豐之入民為之歌曰除吾之害足吾之食伊誰之為
曹侯之力當時雖隣境山地溪澗皆倣其法至今永
賴其所開墾并新設縣治稅糧計千有七百一十二
石九斗三升其逋逃歸來如龔魁等者計六百三十
戶男婦七百五十有六名自是寶慶生齒日繁比于
壯郡其他屢除苗蠻之劫擾而鄰境武岡城步亦借
以安再修橋梁之崩圯而青龍潭江咸賴以濟節賑

境內之飢荒而富室客商皆勸以義凡夫祀曾如驥
之忠毀孟公等淫祠三十六誅貧民妻通富商之姦
尤人所難者也正德四年陞四川左叅政分守川東
道先是藍郛倡亂衆十餘萬公親矢石二十餘陣擒
斬強賊七千九百有六名顆凡在兵間者殆接二年
官軍錢穀亦皆調處總督軍務洪公鍾巡撫林公俊
會舉陞本司右布政使及紀功王給事中萱汪御史
景芳奏勛又於右布政使上加俸一級厥後廖麻子
等再亂都御史彭公澤復委公贊翊爾乃擒斬渠魁
餘黨悉平 欽賞表裏正德八年陞陝西左布政使
時值 王府軍衛應得錢穀當於漢中諸府額辦先
因甘肅有警乃借用其四萬餘石年久不歸以致
宗室衛所缺糧數多嗷嗷不安後公皆陸續補還於
民有益於宗室衛所皆遂其願鎮守廖太監造氊帳
以媚上費用不貲屢欲科民公堅執不從又助巡按
劉御史天和以沮之後劉為廖所中傷然竟莫能害
公十年陞右副都御史巡撫貴州督理軍務兼制湖
廣北道并四川酉陽等處先是鎮草銅平等處苗民
作亂公至出榜開諭懇切行委叅政等官竭心撫
勦陸續擒斬五十名顆并招回逃民各三百餘名夷

患既除地方寧靖蒙勅獎勵稱其處置有方委任得人云普安州苗賊阿則阿馬等糾合群夷詐稱官職為寇凱口地方阿向等亦皆煽亂公皆會議征勦戡定其業垂成時有巡按御史奏公擅調官軍縱容書吏受賄且謂公復而自用不恤人言然公行軍六年有餘風勞疾作恬不與較迺具疏懇乞休致溫旨謂曹祥引疾乞休情辭懇切准致仕時公得旨即歸其後欽差刑部張郎中元電同三司勘審奏復而聖旨謂巡按劾奏大臣不實著罰俸半年隨查公征勦凱口地方苗賊阿向等績則甚著也乃命禮部差人齎表裏白金二十兩賜於其家後都御史鄒公文盛接任猶以公所遺兵糧因成大功云若當公之在位又可知也公弱冠時即以志道為事以憂天下為念其聞時事之善惡而憂喜有甚於當事者後蒞官所至建功未嘗一矜伐故見素林公稱公優於行軍而又善藏其用獨加敬愛焉平生心跡青天白日路人皆能知之歸後日惟課子孫且曰吾自知事時常與諸弟刻苦讀書后弟禎倚皆高舉有名於時若輩不自勵如之何其可繼也其介然自守雖自子婿以下有訟質必不言之當道其子姪有事不

當意者雖賓客在前亦面斥之必不為隱遇人有矯
詐者退則必與子孫言之以為箴戒公幼自孝弟居
喪循禮待人恂恂若未宦者然其吏僕奴役有犯之
者惟以意遣人有以怒相加者公固皆忘其名小大
莫不得其歡心人皆謂公有呂蒙正之量歸後嘗武
城南英會以興後學建竹山書屋以教子孫立曹氏
祠堂以合宗族其所為文皆渾厚平實自名曰南峰
拙稿藏于家公之垂歿也曰吾平生只守一實字吾
觀今之人惟呂仲木孚馬吾死得其言以為吾行狀
足矣嗚呼拙生也晚而公之子深雖與予同年進士
然歿又蚤予未獲遊公之門乃荷公見知如此狀可
辭乎乃因其孫棟事畧為之次第作狀云公生於景
泰庚午年八月二十八日巳時歿於嘉靖十三年甲
午秋九月二日巳時享年八十有五公初配汪氏贈
安人繼周氏封安人繼羅氏子男漢海澄深津洙深
戊辰進士時姦宦劉瑾擅權嘗率百人抗疏於朝罰
跪五日而勞疾作后雖授南京兵部主事竟以前疾
復作而亡娶程氏漢娶江氏海娶汪氏澄娶黃氏繼
汪氏皆汪安人所出津娶江氏洙府學生娶程氏皆
周安人所出洙尊公遺命立為應四公后矣孫男六

栢棟梁栳木楫棟府學廩膳生棣亦府學生木楫尚
幼曾孫三津等擇某年月日葬于某山之原合二安
人壙是宜列其行實俟立言者采焉

都察院右副都御史魏公墓誌銘

張邦奇

公姓魏氏諱英字士華自號赧古宋尚書左僕射杞
之裔南渡家鄞後遷慈溪之雲山曾祖諱尚圓祖諱
文學皆隱其德父諱元吉號慎菴以公貴封太常寺
博士贈湖廣按察司副使母馮氏累贈太恭人公由
縣學生領成化庚子鄉薦辛丑登進士第授南京太
常寺博士癸卯丁內艱服闋改北太常弘治己酉擢
監察御史丙辰丁外艱起復未幾擢湖廣按察司副
使止德戊辰進按察使明年擢江西右布政使辛未
轉雲南左布政使未履任擢都察院右副都御史始

為御史清戎江西戎籍多竄易為奸造類姓冊奏行
諸省遂為常法巡按四川設法擒土官安鰲靖三十
餘年暴亂讞獄詳平多所原宥不苟為苛察要名監
秋闈試諭所司精淳雅之辨得士為多創祠堂祀宋
學士景濂虜匿官印公聞不問頃之印出承勅同
兵部尚書馬公文升輩閱京營官軍以軍士耗損坐
為勲戚權官所隱占一糾以法制不為前却顧慮戎
伍賴為為湖廣副使永順保靖二宣慰分占峒寨雙
殺累年公下車不數日遂行為理曲直示典憲刻竹
符多寡定罪既皆懼伏猶以徭性不常為定疆域構

婚姻以杜後讐蘄水知縣坐累下獄者數年屢更官
司莫為白者公獨力辨竟脫之今世多工為自全每
所屬陷誣誣雖極知其冤慮嫌疑不肯一出口坐視
其顛踣且死不為動或鍛鍊成之嗚呼亦忍甚已矣
使素植堅白內不自愧如魏公亦何必委瑣規避至
若是極也再考最績獲誥命進階贈考妣蓋殊數
也為按察使宗藩以庄田故互持短長悉為辦理全
其好為江西布政寧庶人方恣橫南昌所屬河泊課
鈔欲盡私之公拒甚力莫能得為都御史巡撫貴州
會水西苗阿雜聚眾為亂屠掠城堡僭稱王號公按

形勢覘虛實授方任能環師急攻破寨六百俘斬數千招降以萬計捷聞上降勅獎勵且有金幣之報已而蜀寇方肆流劫諸郡兵連荆湖朝廷頗以為憂檄公并力公選兵搗其腹中連戰破之斬獲甚衆上復降勅有謀慮周悉朕心嘉悅之語然公積苦兵間有退休志乃上章乞致仕既獲命家居開徑掃軌日與賓朋賦詩飲酒恣意所如絕口不道世事踰六年以疾卒上遣官諭祭于家公生天順三年正月三十日卒止德十二年三月二日享年五十有九公少淑義方早有文譽擢冠筮仕歷三朝更七命前後三十年產業無所增拓廉慎之操如一日然而倜儻敢為無或疑畏臨敵制變機智溢發故動獲萬全而謙恭和遜未嘗自伐在臺省所上章奏輒削其稿今藏于家惟平生詩文若干卷號赧古集云娶鍾氏有淑德累封恭人先公數年卒繼娶李氏豐城侯昊之女亦先卒繼蔣氏子男二皆鍾出長光嗣國子生娶司訓周君廉之女次克嗣娶知府余君濬之女女二亦鍾出長適方伯揚公子器之子孫斯次適知府向君錦之子洪遂孫男二印郊孫女四光嗣輩卜以卒之明年七月日葬施舉青陽山之麓先期

奉都憲王公希文所為狀請予銘銘曰
矩步兮或迂疾馳兮或躓絜而行之時之利舉其
網弗急於細辨于中用也惟怨弛兮非康子之靡
張兮非東野之御斯其獨邁羣趨人莫能喻者耶

巡撫貴州都察院

僉都御史張公傳

朱察卿

張中丞名鶚翼字習之上海人也勝國時遠祖有仕
至廉訪使者父棲閑公明經潔行為邑中宿儒從棲
閑公游者多以良吏顯中丞沉毅簡靜垂髫時趨向
即不與同曹類閉門下捷讀書窮日夜之力凡經史
裨官小說無不收括與同產兄自相師友砥礪氣節
名隆隆起已郡大夫交研為子弟師中丞家故落雖
勉就居惟事為人師事不窺官舍外闕郡大夫有所
問中丞謝不知他人請言於郡大夫中丞謝不敢遠

利自潔若持素絲過髮漆惟恐其染也以故郡大夫以重客禮禮之郡邑之長者及樓間公曹耦皆知中丞為非常士矣久困鉛槧益堅其定力不與世相浮沉嘉靖戊子舉鄉試辛丑舉進士授兵部主事時中丞年已四十餘凡天下人物臧否山川險夷錢穀甲兵及當世所宜因革諸務無不通練客有知中丞者言於宰相調吏部主事當是時中丞守山海關欲求其調故不得也中丞在吏部四年以序歷諸司為文選郎中嚴持成法惴惴若恐廢即其人賢雖無援卒舉即其人不賢雖有力者援之力卒亦不舉時有大貴人欲輕重所司法中丞諍不可貴人面發赤中丞雖聲折而色和辭不稍遜避法竟不為之輕重然操心極仁恕其所去人不直彰其所去事使人退猶可自容京師故事官吏部者扁鑰邸戶誠奏使者不得通中丞獨扁鑰其心志不徒不啓戶以障人目也以故善行錢者不以張文選作念門外車馬東西行不加顧盼猶過諸冷局門也時天子任明察文選郎中數為言官論去或一歲中再更中丞竟以廉謹自全然御史中丞執法者日側目矣已而稍遷太常寺少卿再遷南京通政司通政所蒞俱以職辦稱

未幾遷巡撫貴州都御史今南京吏部尚書咸寧王
公時為禮部尚書宣言於衆曰貴州險遠非所以待
張公也欲中丞去者為之長短說王亦卒為之辭
中丞得命乃掀髯笑曰茲行知不免矣然不敢自便
遂行至果盜賊蜩起軍中梁肉告乏吏茲土者宿稱
長於吏術亦莫能展一策中丞誓以畢力捐軀以稱
上使乃持重深慮不苛不柔曰惟節者調度和
輯拊循為務內實焦勞而外若逸豫雖幕府警報日
至治文符如故弗動也臺黎寨苗反印水中丞檄總
兵石邦憲及諸軍鵬勦之斬首級若干級生得苗若
千人馬牛羊若干頭任豪龍阿交蹈土官楊安二姓
隙誘諸苗反涓潭中丞檄石邦憲及諸軍撫安之陰
遣武士以天子威福諭二姓二姓大恐各出死力
立縛其魁麾下三省之兵罷於旦夕時涓潭功為最
大同事者為中丞畫曰報功天子而能為壽於政府
上賞可得也中丞謹謝曰非某所得為於是僅得金
幣之賜丙辰歲天子以陝西地裂變下命先期
考察臣工銜中丞者乃相媒藥抵搆圖所以去中丞
昔嘗知中丞者竟不肯出一白語然中丞各素著無
所指謫遂以老罷去中丞得旨怡然曰處此地方且

宿多罪譴今斧鉞不加而得生還幸矣何以印綬為也趣舍人即駕車歸居家閉門晏如教諸子力孝弟為文章戶外事率皆謝之不知縣長吏非大故不入謁公門外一歲中不一二見中丞車監司部使者數之行縣中丞非有雅故不接納或先期扁舟出遊誠門者曰過我者謹恐而受謁無重主人過也嚴操墮僕各歸之農敗應門惟一二童子僅能持謁報客門內外寂然真可羅雀里中如不知有中丞在故里中相語曰揚揚市中綺衣服而以氣排人者非張中丞廝臺也先是上海城城中丞宅第多在板築下長吏請補以邑中隙地中丞歸悉返之長吏固請卒固讓官二十年祇稠中裙不裁以帛冠裳亦不故求其美寢戶內惟一木榻冬夏帳具不盛榻前敝篋一二書數卷蕭然也平生不欲以所長先人雖以惠澤德人事必思之一再乃舉惟恐形其不舉者對子弟未嘗雌黃人得失亦絕口不談游宦事人或以吏部政質中丞中丞笑曰忘之久矣接单門下士必與鈞禮矣談假以顏色士有尺寸長游揚之不置口士多樂附而願比為子弟數所為文法兩京詩肖陶韋自免官後固不應監司諸貴人所丐聞所善山人輩有所屬

便伸帑提筆笑中丞長子秉一仕光祿寺監事仲子秉初季子秉介皆諸生亦奇士

論曰中丞年已七十矣見中丞每言棲閑公與同產凡故狀淚輒下不能收又嘗見中丞曰余自釋褐來不敢廢天子尺寸法時雷霆適去耳指之曰有如此雷霆朱生為之悚然避席今觀中丞子其兄子如子諸子產不過中人家乃知中丞非徒良吏也真古孝廉哉真古孝廉哉

都察院右僉都御史霽寰先生吳公行狀

汪道昆

隆慶三年春二月甲子故都察院右僉都御史霽寰先生卒于家春秋五十六耳諸子將奉大事屬余小子布狀行且謁張相君殷宗伯為碑為銘昔在南宮三人皆出先生門下即余小子無能為役其何敢辭先生諱維嶽字峻伯孝豐人姓吳氏其先自淮海扈宋南渡居孝豐明興先生六世諸祖並顯其一歷通政司叅政其一守萊州至大父吏部公家大起吏部公二子並登進士長公麟由御史歷山東按察司副

使以親老乞歸次公龍由吏部郎中歷參政吏部公
賜爵如子配張氏封宜人當是時門戶赫然盛矣宜
人夢天女授美子曰帝畀女孫於是家婦方恭人
身以正德九年六月四日舉子宜人昔夢庭下立柱
石千仞上屬于天長公亦夢舍後山高出雲端巖巖
嶽立則以爲貴徵也因命名竒之先生頊而在英氣
勃勃始就外傳日誦數千言始勝冠輒起民間首諸
生藉嘉靖丁酉鄉試先生以執禮舉第五人明年舉
進士除江陰縣令操法得民會沙賊偕號反崇明與
縣夾江相距縣故無城郭先生躬率甲士謹備之賊
無敢犯江陰完境內三載應召得刑部尚書郎先生
明習法家主部尚書奏讞詔定問刑條例部尚書舉
以屬吳郎於是吳郎具藁部尚書籍上之大稱吉著
爲憲令庚戌虜大入詔收兵部尚書生吏議輕建議
者吳郎從容上疏曰尚書無他獨事重重發耳不聽
然廷中獨多吳郎慮囚江西囚得從末減者萬五百
仇者侵徐滾母塚滾殺之先生當曰滾以母故殺人
且侵塚在辟滾得免劉福德讓里媪子不孝里媪子
出惡言福德怒毆殺里媪子先生當曰誅不孝柰何
與不孝子等死邪從輕議釋之朞月而編部中法無

不當既歸省居大父及父母喪泣血三年目幾眇喪
畢補駕部尋轉按察司副使督學山東先生下車操
功令唯謹謁闕里徘徊洙泗鄒嶧之間檄孔顏孟三
氏教授司定約法勒石學舍宣言曰建首善請自三
氏始其世世守之廣厲諸生務在躬化所至左右文
行無不當于人心追祀名宦鄉賢表章節義齊魯之
士庶丞鄉風居五年進湖廣布政司右叅政尋進江
西按察司按察使已復拜都察院右僉都御史巡撫
貴州言者謂三省並建撫臣請罷督府廷議貴州當
楚蜀之會今巡撫具文武材其以川東湖北轄貴州

罷督府便先生上便宜五事 上納之貴州半雜夷
道多剽掠乃馳羽檄分道遣林官護游校偵察之嚴
踐更懸賞格夷寨各立夷長籍記寨中諸夷若干人
保界分區界內有犯坐夷長於是諸夷無敢竊發道
乃通夷酋楊珂仇其叔進椎掇六洞先生則以進椎無
故立珂為後後有子歌殺珂諸夷將釋憾於進椎無
所發珂急率憾者距進椎歷十有七年當事者議未
決乃授有司方畧責珂降珂乃面縛伏辜待以不死
事上詔賜白金文綺論功有差於是先生部署諸夷
法不軌者時王世麒叛清浪宋廷武宋鵬宋鶯叛卓

塘王阿利等叛平伐先生笑曰世麒祖父逆節父漏
天誅乃今濟惡不悛亟誅世麒以正國法諸宋由爭
襲起黔蜀觀望三十餘年出其不意急縛之一旅足
矣平伐負固為虐可襲而禽於是斬世麒捕逆武鵬
驚傳阿利境內悉平會有人言先生以改南去先是
先生聞仲第維庭病甚則自江西趣歸未至而仲亡
哀之甚會程期急尋以單車赴貴州居常念仲不忘
食浸減驛書至先生頓首曰臣不幸有狗馬病使臣
得歸骸骨終餘年君之賜也先生彊直方正不取苟
容初對公車長公所善故人在供奉先生無私謂心
望之先生射策得當執政間且薦高等故人匿先生
牘遂不前居江陰會舒御史汀行縣故事御史謁廟
縣官長跪候車御方齟齬諸縣官暴甚先生倡言曰
天子置縣官南面而臨百里且先師在柰何曲跪而
蟻橋門御史目攝之然卒未有以中也始為郎吏部
尚書能公浹請以吳郎調吏部坐不拜嚴相國議格
不行嚴相國屬先生序鈴山詩先生固辭謝留山東
不調客以行間說先生先生謝曰僕待罪儒宗終不
以善仕而間相國坐泰安州試士段御史顧言按部
且來有司請避舍以居不許藩臬大人畢從御史登

成先生獨留不行及赴江西監司遇御史京口前驅
不避御史御史嘆之 上遣使者出貴州使者失望
尋中以飛語御史亦倡議南中嗟乎直道不容即明
時不免耳始歸田里季第維京亦自禮部移官先生
語曰吾結髮入官齒駸駸暮矣自今惟日討諸子而
訓忠孝力耕稼供田租此吾事也季齒壯其母志先
業以報國家比年讀書灌園將以家食老矣季轉南
京刑部省先生于家會先生嚴氏女過哀病大作踰
月而病革召季及諸子屬後事語甚詳顧謂鄉人某
子甲往饋朱衣毋以歛乃與先生受室長興臧氏封
女人贈恭人舉子男一人女三人其父應奎故以禮
部主事諫 先帝 今上即位贈光祿寺少卿繼恭
人陳氏為永嘉萬戶缺女舉子男二人女一人長子
稼端補縣諸生娶歸女陸侍郎穩女次稼翊聘秀水
項吏部治女次稼澄聘烏程閔茂才一崔女長女適
華亭太學生馮繼可次適烏程太學生茅用吉次字
烏程閔世南先生家世蓋州顧折節務恭儉年少嫻
于文學終其身不衰始從宦京師執舉子業師事袁
卽襄莊卽用賓旣而講德脩辭師事毗陵唐太史應
德從毗陵諸令善臨川徐良傳臨朐馮惟訥從諸尚

書郎善濟南李攀龍江東王世貞武昌吳國倫廣陵
宗臣朱曰藩當是時濟南江東並以追古稱作者先
生即遂遂師古然猶以師心為能其持論宗毗陵其
獨造蓋有足多者乃今遺文具在大都載奏議及歲
編中

都察院右副都御史陳公神道碑

王世貞

當世宗之二十載而臨安陳次公與其兄觀察公
俱以工制科業馳聲公車間而亡何俱成進士對大
廷俱暫而胡髯被膺也班行中爭目屬之曰彼髯者
伯仲耶而偕國器尋以次當謁選為曹主事觀察公
得工部改兵部而次公得刑部其主事以廣西司而
員外郎則雲南司郎中則廣東司刑部最號為才士
大夫藪其雋者往往相習古文辭杯酒倡和次公迺
亦長古文辭而不屑以是顯益精為法比當是時同
舍郎故中丞吳公維嶽司空杜公拯方伯盧公夢陽

今少保王公崇古大司馬翁公大立司寇王公宗沐
皆善刑名顧家獨推次公精而公之在主事嘗讞決
江北殊死以下毋枉在員外郎數攝其長篆獄無滯
繫在郎中所隸錦衣緹騎繫治亡命巨盜大俠日三
四至為巽心術之必以實不輕操舍而當者多內服
不寃於緹帥亦亡見形迺蓋滿六載而尚書署郎中
考有曰冰蘖者曰衡鑑者故倚公左右手也公遂擢
知河南彰德府人意公自法曹出必斤斤三尺而公
不然謂梁國縱大都難治我何以柱後惠文狗張子
高即不獲已一施之宗室子侯目於是諸子侯人人

惴相約毋犯此髯史若也有謹避之耳而公務隱郵
問左疾苦小民戴哺衽而治公所幹飭田野開橋梁
固傳舍櫛刷以是大得遠近聲薦剡宴上而郡所奉
鄭王老儒慕危言以四箴上觸天子怒時有廢侯
訶伺指則疏誣王罪惡至大辟以上天子為置獄
使中貴人偕司寇緹帥往治之以屬公公不肯為巧
鍛亡所得中貴人怖曰如非縣官指何公曰吾知法
如是耳獄上王僅坐長繫國無奪其後復爵如故公
入覲上計天下郡守第一遷江西按察副使飭九江
兵備至則除戎器蒐卒補艘完城堞諸盜起必窮跡

其窟而洗之長江偃然矣而以母喪歸服除仍得故
九江治而益以楚之蘄黃其吏民鼓舞迎公入不待
拮据而理公又嘗直二囚之抵殊死者人以為神無
何進山西左叅政時伊王治河南以驕恣不道聞
天子使少司寇趙公大佑偕中貴人緹帥往按如鄭
故事趙公左右顧無可任者既而曰吾得之矣故治
鄭獄者陳序今在晉移以往可也上疏請之即報許
而公之治伊獄捕逮其國臣翼虎者攷訊不小借王
坐長繫加芻國除伊故寵王非鄭比公不以指故小
屈法天下聞而快之公還晉所部獲北虜謀及大盜

之持白蓮教者以功論賜帑金又嘗設法輸庾數萬
石救隣道饑久之擢湖廣按察使有二令坐法當公
讞公斥其墨者而寬其中微文者暨遷四川右布政
使甫離境而見寬令籛金為壽公大怒罵曰吾嚮者
誤寬之何所自得金耶亟去毋汙我公之任蜀逾年
而自其省為左布政使時方建大朝宮材木俱取辦
蜀困且不支而公從容調訾費公私俱賴以濟蓋公
前後無慮十餘政而蜀輿彰德號沃藩望都使守所
蒞獨泉谷重而公尤慎出納稽章程亡論亡所染指
即左右奸黠逆自斂以故公循吏狀非一而廉尤其

表表者前後凡兩遇試入棘所取皆知名士上計復
為天下第一遂拜都察院右副都御史巡撫貴州兼
督川東辰沅諸軍當是時施州蠻黃中叛跳川東支
羅牛攔坪固飄掠傍郡邑詔公偕楚蜀二鎮合兵討
之公自川東率大軍入深箐多張疑兵誘其毒矢石
殆盡而間道募死士繞出其後急擊大破殺虜千五
百餘級焚洞砦百餘而蜀兵亦從西北躡之黃中迫
乃挺身跳入楚叩軍門請死當是時貴與蜀兩鎮有
戰功而楚坐得酋首蜀自以駘之故與楚爭功不能
決公第謂楚蜀勢異不有勦者誰與撫地不有撫者
誰與勦窟且皆天威也三省安得徼之疏上大司馬
倚以決更推公能讓而公又與石都督邦憲合筴破
叛酋楊珂之六洞十二寨悉俘其父子兄弟餘黨歸
農者以萬計前是公之自計返也聞長公訃馳歸哭
盡哀乃歎曰柰何遂不獲以餘年奉兄顧我何忍獨
食大官廩既抵鎮憂思日夕不忘以至屬疾遂上疏
請骸骨 天子高其誼而許之當候代傳鎮遠以水
巴恨苗普面等叛公率石都督兵與疾而剋平之曰
即病不以賊遺後人也公歸而御史三上公前後戰
勛被賜白金文綺加芻艾之病良已人謂公五十而

懸車視薛大夫不太蚤耶夫欲樹清廟而棟梓之舍如匠石何於是南臺之薦公者屢至已登太宰啓事矣公夷然弗屑曰吾六月孤也幸至此足矣公所稱六月孤者蓋其先人中憲公偶於黃太恭人以春正月舉長公冬十一月舉公舉公之六月而中憲公卒黃太恭人莞然撫二孤呱呱也其自舜象而後則與長公相切劘師友矣公之生夢宋蘇文忠公是而入至是有欲奪公業使習吏者公不肯曰柰何獨棄我吏而會太恭人亦自悟夢故得無奪公之始屬文不能如長公敏十五忽病病而夢與故新建伯王

文成公視師大捷已荷鉏田間蘧蘧適也既覺病洒然若脫者自是文思淳發每試輒與長公相甲乙以至成其名既視師貴陽過文成故謫所儼乎羨墻之思得老荷鉏夫豈偶然已哉公性孝友其事太恭人備志養居喪柴瘠偷禮居自恨不及中憲公之養也墓田構丙舍貌像而時時瞻禮焉事寡姊如其母撫孤姪如其子晚節好施予於橋道必葺宗戚恃以衣食者若而人性伉直不能腹藏過然亦不復留以是人雖外莊公而中無怨者公尤不好侈靡間挾二奚輕刀信步湖山間卒值之不知為貴人也有子禹謨

也材壯而成進士公雖心自愉快未嘗不飭以軌物也為詩文援筆立就務期以達其所欲言者而已曰使我為名高者去我不已遠哉其著書有五經輯畧性理纂要諸子粹言葩經講義督撫奏疏台牘味稿藏於家公素強少疾既用禹謨拜中書舍人時徽號恩予誥為通議大夫忽病瘧數更藥不效竟卒其卒萬曆辛巳十月距其生壬申得年七十公諱洪濛字元卿少則精世法始而亭繼而庵皆署之曰抑以見志蓋至老貴而不歎人以踰禮稱曰呼我抑庵足矣娶於韓累封淑人丈夫子三長則禹謨先後娶李氏

張氏贈封孺人次夔謨邑諸生娶施契謨娶倪俱貳程出女七人孫男二女二婚嫁皆名族公之卒禹謨上書請於天子得賜祭塋如故事禹謨與諸子治窀窆於荆山之原賜地歸有日矣具狀以授不佞自曰為我志麗牲之石不佞之先御史大夫公實同公舉進士不佞又從公西曹後如嚮所述六七君子相與同切劘者何敢辭敬為銘曰

皇虞而後降為陳宋最聞者三修鱗從龍渡江邁此屯厥後播遷乃沈淪代有晦顯德則均公起孤童少恂恂矯如雙鶴搏太昊法曹斤斤愛一類敷歷中外

稱能臣鬼方之伐毋決旬萬血伏死不為磷力披瘡
毒成陽春上書返鷓門歸津西湖水清明角巾白雲
不救中丞貧嘉靖以降少完人公於其時氣獨振有
子汗血趾則麟公未竟吐皆經綸付之渣然返於真
荆山之原鬱嶙峋 帝令司空來治窀萬億百年永
無磷

都察院右副都御史柳菴陳公墓志銘

金有子

都御史陳公以辛巳十月七日卒於家 上俞其子
中書舍人禹謨請命大宗伯予祭大司空治窀事令
舍人得終制舍人手其師王太史狀來徵銘按狀公
諱洪濛字元卿自號柳菴其先系出閩中遠祖漸仕
宋為耀州節度推官以諸父並居宰執徙家汴其徙
臨安則學士簡齋公始曾祖俊祖琬父為悅清公景
祥生子二長洪範官按察副使次即公悅清公以公
舅弟貴累 贈中憲大夫河南彰德府知府母黃累
封太恭人公方壬悅清公夢觀蘇學士遂舉公甫六

月稱孤太恭人鞠之比長命習法家言而公志儒弗
願也太恭人為雪涕而喜年十二通經書大義十五
嬰奇疾夕夢與王文成公視師功成退耕江介遽然
適也自是朗悟若神庚子舉于鄉明年同長公舉進
士長公授工部都水司公授刑部廣西司俱主事丙
午慮囚江北具報可丁未遷雲南司員外郎尋遷廣
東司郎中兩視司篆善爰書諸所按讞皆手出吏視
其文辭無不聾且服者司寇遂倚以書獄滿六載考
出守彰德郡中故多宗室恣橫公一以法繩之時鄭
王好文學謬四箴規時政屬庶人佑善衷誣王上

怒甚遣親信大臣就訊公為白其狀衆危公公曰吾
守三尺目柰何令上有蔽讒間戕骨肉名獄上止
錮王終身趙將軍厚燒盜劫人屠姦人女死公擒珍
其黨趙宗為安郡驥公為發粟貸民所全活甚衆尤
注情校士典壬子試稱得人當路借以為重云明年
入覲以治郡高芽稱尋擢江西按察副使勸民遮
留不能得為肖像祠焉而公當備兵九江多盜區傷
敗王旅公至勅諸賊曹跡賊所在必窮剔毋縱數年
之間長江晏如而又以其間補伍清屯練兵增堞浚
陽遂稱雄鎮己乙卯罹太恭人憂毀瘠甚服除赴京

朝論以潯陽士民思補前秩兼轄楚蘄黃至則益修
昔日之政有二因抵死公得其寃以寃去未白至是
請臺使者從末減庚申陞左叅政山西蒞冀南擒虜
偵者一人又捕白運教諸賊蒙特賜帑金屬伊王恣
橫不道都御史疏其罪于朝遣使驗問不服乃廣
賂求緩會上更遣少司寇趙公覆按乃疏公名與
俱上先之曰是嘗按鄭藩者邪公間命即乘遽
往盡得王諸不法事辭具服國除幽之鳳陽公兩平
亭宗正事皆當旨而以晉藩按洛尤異數云亡何
遷長楚臬楚故劇藩而公以彊明割之庭無留獄前

是二令被逮公一訊即狀乃斥其墨敗者寬其中微
文者比遷去寃令以數百金伺道上公大怒吾豈以
金故緩若邪若柰何不自礪而以私蟻我令慙去壬
戌春擢右布政四川踰年轉左時起三殿工蜀困
采木之役公一意拊循視前使有加民倚康焉是秋
調棘院事拔士居多乙丑入覲推都察院右副都御
史巡撫貴州兼督湖北川東軍務下車即條上利弊
若雲貴互選及裁驛傳增邏卒之法詔報可貴竹
長官多侵民而民豪者亦通苗公令還予民地而又
時出奇筴除其豪時施州酋黃中叛擾雲萬等縣先

奉 詔剿賊不克公檄川東諸道兵進討賊入深箐
陵高阻隘蒞蘭石傳毒矢以拒我師公乃募死士夜
從間道上先發其為機以蒞石者直抵砦門斬苗數
十人呼聲震天地擒斬賊以千計破洞寨百餘賊勢
窘司投湖北軍降公方謀馳露布已乃聞二省先入
疏爭功公具言楚蜀異勢撫勦同情功不宜顯有朝
議竟直公有大盜楊珂為蜀楚粵患歲久愈熾公計
吾不蚤滅此是遺不可為之疾腹心也乃授計諸將
悉殲之餘衆皆潰初公聞貴州命時長公前卒公感
慟連日夜又畏簡書遂得病至是上書乞骸骨歸再

疏得請未即途忽鎮遠功水諸苗叛公亟誓師往討
平之丁卯得代歸 朝廷前以軍功最大賜白金文
綺者三公惟閉門養疴絕交謁問一赴鄉飲之禮四
壁圖書蕭然其宦轍所至必覽名勝於世味泊如也
瑩傷葺一室扁曰補思懸父母像其中拜奠如生撫
孤姪如己子養寡姊如母尤惓惓以勗子為念禹謨
既成進士會戊寅 覃恩得進公階通議大夫公手
加額曰老臣分填溝壑乃更辱 嘉命哉惟有一清
忠遺子耳公美髯夷度飲人以和性篤厚其親族貧
士所資以舉婚喪者應之不怠詩文不為名高觸輿

輒就所著有五經輯畧性理纂要諸子粹言督撫奏
議及講義文評詩稿藏於家凡歷官十一政薦疏三
十有奇配韓氏累封淑人子三長禹謨娶於李再
娶於張次夔謨娶於施契謨娶於倪女七壹純德純
潔純靜純淑純懿純適陸科王嗣敬茅迪吉高深呂
衡甫沈如璋其一尚幼禹謨暨壹純德純淑純皆淑
人出夔謨契謨靜純側室程出潔純懿純與其幼側
室馬出孫男三孫女二卜以某年月日葬於荆山之
陽某曰有虞氏可謂至德矣帝王神明之胄其胙土
受姓者不可數計而陳之昌與天啟豈溥龐湛濊澤
為之銘銘曰

故彌久而滋邪柳菴公固天薦其命迺其自修又不
墜厥宗故符應叶於夢寐昔賢所謂嶽靈者非歟卒
之日星隕於屏垂象可知矣夫既世有明德而裕其
孫昆無有畜不施無有樹不滋此天常也余夙嚴公
孰昌于宗審厥中乎孰膚于功篤厥共乎矯矯二龍
升高穹乎伏雌飛雄綏西戎乎有音隆隆斯多螽乎
豈本根之不封而枝葉之能叢乎嗟我後蒙視陳公
乎

都察院右僉都御史竹巖王公墓表

王世貞

蓋錢塘有陳善方伯先生云則世貞丈人行也日而
以書奉故御史中丞王公諍之志銘若傳而投世貞
曰王公於嘉隆間歷宦中外為名臣而其按滇也則
嘗採吏民議舉不佞於既廢之後而揚之嘗以有今
日不佞且老而王公死矣念無以報公手志狀而納
之窀宮而侯次卿者為之傳而不佞猶有歉然古者
墓有表夫標也標其行而著之石以使夫過者式象
焉其在吾子之一言甚矣陳先生之厚也夫王公以
公舉陳先生陳先生不忍於其身後而媿媿若此而

王公世所稱賢者也陳先生蓋亦以公報王公而屬
之謏劣之世貞母乃非所以用其報乎哉雖然以世
貞之奉陳先生托而從事於賢者之身後則甚幸夫
王公者浙之永嘉人也字子孝國初自台之黃巖
徙不十傳而有丁數千指顯貴爲京朝官比比而
公之父鍊僅起諸生爲竹山教諭遷南雄教授以歸
教授公之宦竹山也公時從猶未娶間過處士藍儻
儻夢冕而過者衆指曰御史中丞也質明司客無所
得獨得公見其狀頗暫而益竒之遂以其所愛女女
焉後封所謂藍恭人者也而公遂隸其邑籍補博士
弟子數試有聲實父之膺選貢入南太學六載舉於
應天又十載成進士授莆田令未上而以教授公及
母鄒憂歸服除補溧陽令入爲山東監察御史按河
東鹽筴還復按雲南尋刷應天卷滿考贈教授公如
其官母鄒孺人父之超爲大理寺右丞遷左丞進右
少卿遂爲左少卿推恩贈御史公復如其官孺人曰
恭人尋以都察院右僉都御史出撫貴州而藍處士
之夢驗蓋垂五十載矣罷歸里聽調竟不調而以壽
終始王公之令溧陽其上豪肉視卑細而猾吏舞文
爲食公一切以嚴明破之雖貴勢有力亡敢譁張者

而時時尉問田野疾苦毋使困徭役上官往返供張
草具毋所芬華巡撫都御史以是不悅公亦有所指
擿而生事被建公得免又嘗用持法平忤巡按御史
幾見中而察公廉亦中止公竟以令高第徵矣按河
東而其長鄔自臺總覈鹽筴偉相重焉威福所至挾
傾帑公從容說之曰吏不奉行明公德意而以侈名
歸明公非計請小抑損之鄔語屈公手謝公乃勅其
下鄔公不為汰取辦具而已已其地旱公徒走而禱
雨隨澍所勾檢宿蠹殆盡雲南之世帥沐朝弼者自
詭以寵王多縱容為姦俠虐使其下所難獨巡按御

史利寵之不得則孽之而公甫奉命便道過里則朝
弼使使奉書以黃金數百它寶物亦值數百金贄公
語之曰使而主以一束帛來敢不拜賜今非所以交
際執法臣也既至而盡得其惡萬狀則稍取其客寘
之理弗改則懲其家屬又弗改乃具疏列上其狀
天子震怒焉禡朝弼歲祿而陳先生者前以視學至
數館按察章與之抗陳先生之得歸亦取朝弼中凡
八年而公白其賢天子亦為之屈甲令而復官
陳先生公按雲南父旌廉吏懲貪墨培豪狹郵孤筮
揚主威德於萬里外為諸方冠它善事不可勝記

而此大者其既滿而朝粥餞之郊飲前行十餘舍寘
覺有物簌簌動喉下問左右噤莫敢言公乃自以意
呼燒酒調仁砂而恣進之覺物下至膈復進之至腹
則大痛洞瀉生血垂爲鰲形者數百千而愈左右乃
敢言曰公天人也中此法不解公之刷卷手自稽覈
吏不得緣而縱舍然不爲濫入曰吾非儲贖鍰吏也
其爲大理則平劑三尺所謂賣休買休曰貧民棄其
婦懲之可而柰何傳之姦而辱之於司寇廷辨上
是公著爲令最後貴之水西宣慰安國寧戕殺諸父
與王師抗廷議以公才而帥之公至而總兵安大朝

已從諸道兵深入公繼之不卽平乃上疏自劾得請
公一爲令兩按滇晉所至皆有赫赫名去而又皆肖
祀之其調以非罪氣力尚壯而自歸後絕不通朝貴
人問知公者不當要卽當要亡肯爲公力者竟不用
公雖不竟用然亦足以暴白而完其天於正寢之牖
亦不爲不幸也公性至孝爲諸生時嘗以夜游憂其
父遂絕不夜游當父母見背業皆八十餘矣哀毀幾
滅性老而及之未嘗不涕沾膺也家遺產悉以讓諸
兄弗取布衣藿食不爲貴改道遙尚羊循物無競與
其從子副使叔杲大叅陽德年德差次祭酒於邑里

有丈夫子五人諸孫十一人彬彬稱其家公之貴而
從少卿公南也蓋時時念竹山云吾起家於是故署
其齋居曰竹巖所著有滇南奏疏詳刑議大學衍義
通畧若干卷世貞故與陽德善而陽德之從季曰贈
太僕少卿汝脩者以直節死難顯余故嘗表其墓今
復表公而陳先先生之義附焉曰永嘉之王有二君
子前後表之無愧辭

